


冊府元龜

六百一之四

百八十一



三〇〇	一	五三七	五三四五	漢書門
冊	架	函	號	類

三五	三〇〇	五三四五	漢書
函	冊	號	類

內閣文庫	
番號	漢 5345
冊數	300 (181)
函號	365 6



册府元龜



淮南李嗣京參閱

西極文翔鳳訂正

豫章黃國琦較釋

學較部

辯博

恩獎

辯博

易曰學以聚之問以辯之傳曰強學以待問蓋夫六
藝之富九流之廣有先聖之微旨有羣儒之精義非
窮理盡性覃思研幾不能臻其闕非原始要終聞一

册府元龜

學較部

卷之六十一

知十不能闡其流故有設齋以升抵掌而論俾夫前
訓洞開諸生景附誠儒門之標表士林之規矩也然
則詞有枝葉垂誠禮經學無師法見嗤先哲苟辯而
不違於道博而無陷於野則可以博道駕說為縫掖
之所宗矣

漢朱雲字游魯人也年四十從博士白子友受易又
事將軍蕭望之受論語皆能傳其業是時少府五六
充宗貴幸為梁丘易自宣帝時善梁丘氏說元帝好
之欲考其異同令充宗與易家論充宗乘貴辯口
也言因藉貴尊之權也諸儒莫能與抗皆稱疾不敢會有薦雲

者召入攝齊登堂

齊衣之下裳

抗首而請音動左右

抗舉也

既論難連柱五鹿君

柱刺也

故諸儒謂之語曰五鹿

岳岳朱雲折其角

岳岳長角之貌

繇是為博士

後漢戴憑汝南平輿人光武時郡舉明經徵試博士
徵拜郎中公卿大會羣臣就席憑獨立世祖問之對
曰博士說經皆不如臣坐居臣上是以不得就席帝
即召上殿令與諸儒難說憑多所解釋帝善之遷侍
中後正旦朝賀百寮畢會帝令羣臣能說經者更相
難詰義有不通輒奪其席以益通者憑遂重坐五十
餘席故經師為之語曰解經不窮戴侍中

賈逵字伯通能誦左傳及五經本文以大小夏侯尚書教授自爲兒童嘗在太學不通人事諸儒爲之語曰問事不休賈長頭明帝時爲郎與班固並較秘書李育爲博士章帝詔與諸儒論五經於虎觀育以公羊義難賈逵往返皆有理證最爲通儒

鄭玄字康成受業於馬融獻帝時大將軍袁紹摠兵冀州遣使要玄大會賓客玄最後至乃延升上坐玄身長八尺飲酒一斛秀眉明目容儀溫偉紹客多豪俊見玄儒者未以通人許之競設異端百家互起玄依方辯對咸出問表皆所得未聞莫不嗟服紹舉玄

茂才表爲左中郎將

魏樂詳高祖黃初徵拜博士十餘人學多褊又不熟悉惟詳五業並受其或難質不解詳無愠色以杖畫地牽譬引類至忘寢食

嚴幹特善春秋公羊司隸鍾繇不好公羊而好左氏謂左氏爲大宮而謂公羊爲賣餅家故數與幹共辯長短繇爲人機捷善持論而幹啗口臨時屈無以應繇謂幹曰公羊高竟爲左丘明服矣幹曰直故吏爲明使君服耳公羊未肯也

晉賀循爲太宰朝廷疑滯皆諮之於循循輒依經禮

而對爲當世儒宗

宋周續之字道祖高祖召之爲開館東郭外招集生徒乘輿降幸并見諸生問續之禮記傲不可長與我九齡射於矍相圃三義辯析精奧稱爲該通

顏延之爲太子舍人鴈門人周續之隱居廬山儒學著稱永初中徵詣京師開館以居之高祖親幸朝彥畢至延之館列猶卑引升上席帝使問續之三義續之雅伏辭辯延之每折以簡要旣連挫續之帝又使還自敷釋言約理暢莫不稱善

南齊陸澄爲度支尚書令國子博士尚書令王儉自以博聞多識讀書過澄澄曰僕年少來無事惟以讀書爲業且年以倍今君少便鞅掌王務雖復一覽便諳然見卷軸未必多僕儉集學士何憲等盛自商畧澄待儉語畢然後談所遺數百千條皆儉所未覩儉乃歎服儉在尚書省出巾箱几案雜服令學士隸事事多者與之人人各得一兩物澄後來更出諸人所不知事復各數件并奪物將去尋領國子祭酒竟陵王子良得器小口方腹而底平可容七八升以問澄澄曰此名服匿單于以與蘇武子良後詳視器底有字髣髴可識如澄所言

梁周捨初仕齊爲太學博士遷後軍行參軍明帝建武中魏人吳包南歸有儒學尚書僕射江祐招包講捨造坐累折辭理適逸由是爲口辯

謝舉爲吏部尚書初北渡人盧廣有儒術爲國子博士於學發講僕射徐勉以下畢至坐舉造坐屢折廣辭理通邁廣深服仍以所執麈尾薦之以况重席焉劉杳爲太學博士宣惠豫章王行參軍杳少好學博綜羣書沈約任昉以下每有遺忘皆訪問焉嘗於約坐語及宗廟犧樽約云鄭玄答張謂爲畫鳳凰尾娑婆焉今無復此器則不依古杳曰此言未可必安古

者樽彝皆刻木爲鳥獸鑿頂及背以出內頂魏世魯郡地中得齊大夫子尾送女器有犧樽作犧牛形皆永嘉賊曹嶷於青州發齊景公冢又得此二樽形亦爲牛象二處皆古之遺器知非虛也約大以爲然約又云何承天纂文竒博其書載張仲師及長頸王事此何出杳曰仲師長尺二寸惟出論衡長頸是毗騫王宋建安以南扶南記曰古來至今不死約卽取二書尋簡一如杳言

紀少瑜年十九歲遊太學備探六經博士東海鮑暉雅相欽悅時暉有疾請少瑜代講少瑜旣妙玄言善

談吐辯捷如流

陳戚袞爲太學博士梁簡文在東宮召袞講論又嘗置宴集玄儒之士先命道學互相質難次令中庶子徐擒馳騁大義間以劇論擒辭縱橫難以答抗諸人懾氣皆失次序袞時騁義擒與往復袞精采自若對答如流簡文深加歎賀

蕭濟字孝康東海蘭陵人少好學博通經史論武帝左氏疑義三十餘條尚書僕射范陽張纘太常卿南陽劉之遴竝與濟討論纘等莫能抗對

後魏封偉伯爲太學博士孝明時將脩明堂廣集學

士議其制度九五之論久而不定偉伯乃披簡經緯上明堂圖說六卷

北齊邢邵字子才爲中書監國子祭酒博覽墳籍無不通曉晚年尤以五經章句爲意窮其指要吉凶儀禮公私諮稟質去疑惑爲世指南

後周呂思禮性溫潤不雜交遊年十四受學於徐遵明長於論難諸生謂之語曰講書論易鋒難敵十九舉秀才對策高第除相州功曹參軍

樊深行下邳縣事太祖置學東館教諸將子弟以深爲博士深經學通贍每解書嘗多引漢魏以來諸家

義而說之故後生聽其言者不能曉悟皆背而譏之
曰樊生講書多門戶不可解然儒者推其博物
隋何妥初仕周爲太學博士周武帝初欲立五后以
問儒者辛彥之對曰后與天子匹體齊尊不宜有五
妥駁曰帝嘗四妃舜又二妃亦何嘗數

楊汪爲國子祭酒帝令百僚就學與汪講論天下通
儒碩學多萃焉論難鋒起皆不能屈

馬光爲大學博士嘗因釋奠高祖親幸國子學王公
以下畢集光升坐講禮啓發章問已而諸儒生以次
論難者十餘人皆當時碩學光剖析疑滯雖辭非俊

辯而理義弘贍論者莫測其淺深咸共推服帝嘉而
勞焉

房暉遠國子博士開皇中帝令國子生通一經者並
悉薦舉將擢用之旣策問訖博士不能時定臧否祭
酒元善怪問之暉遠曰江南河北義利不同博士不
能遍涉學生皆持其所短稱已所長博士各各自疑
所以久而不決也祭酒因令暉遠考定之暉遠覽筆
便下初無疑滯或有不服者暉遠問其所傳義疏輒
爲始末誦之然後出其所短自是無敢飾非者所試
四五百人數日便決諸儒莫不推其通博皆自以爲

不能測也高祖嘗謂羣臣曰自古天子有女樂乎楊素以下莫知所出遂言無女樂暉遠進曰臣聞窈窕淑女鐘鼓樂之此卽王者房中之樂著於雅頌不得言無高祖大悅

劉焯以儒學知名爲員外將軍與左僕射楊素吏部尚書牛弘國子祭酒蘇威國子祭酒元善博士蕭該何妥大學博士房暉遠崔崇德晉王文學崔廣等於國子共論古今滯義前賢所不通者每昇座論難鋒起皆不能屈楊素等莫不服其精博

王頗字景文爲著作佐郎尋令於國子講授會高祖親臨釋奠國子祭酒元善講孝經頗與相論難詞義鋒起善往往見屈高祖大奇之超授國子博士褚輝字高明吳郡人煬帝徵天下儒術之士悉集內史省相次講論無能屈暉者

唐陸德明受學於周弘正梁國子祭酒徐孝克開講恃貴縱辯衆莫敢當德明便與之抗對合朝賞歎隋煬帝嗣位以爲秘書學士大業中廣招明經之士四方至者甚衆遣德明與魯達孔褒俱會門下省共相駁難無出其右後爲大學博士高祖親臨釋奠徐文遠講孝經沙門惠乘講般若經道士劉喜講老子德

明難此三人各因其宗指隨端立義衆皆爲之屈
徐文遠博覽五經尤精春秋左氏傳後周時有大儒
沈重講于太學文遠就質問數日便去人或問之答
曰觀其所說悉是紙上語耳僕先已誦之至於奧曠
之境此君翻似未見有以其言告重者重與論議十
餘反甚歎服之隋開皇中累遷大學博士至唐爲國
子博士高祖嘗幸國子學遣文遠講孝經諸儒論難
蜂起文遠隨方辯折言如湧泉聽者忘倦焉
孔穎達初仕齊爲河內郡博士時煬帝徵天下儒生
集於東都論講令禮部尚書楊玄感主其事穎達與

諸儒論難鋒起咸爲之屈後爲國子司業與諸儒議
歷及明堂皆穎達之說
顏師古爲中書侍郎太宗以經籍去聖久遠文字訛
踏詔師古開正之及成又詔尚書左僕射房玄齡集
諸儒討論得失諸儒傳習師說舛謬已久皆竊義非
之於是異端鋒起師古一一辯答取晉宋古本以相
發明所立援據咸出其意表諸儒皆驚所未聞歎服
而去也

虞世南爲秘書監貞觀八年七月隴右山摧大蛇屢
見山東河南淮海之地多大水太宗以問世南曰是

何祥也修何術可以禳之對曰春秋時梁山摧晉侯
召宗伯而問焉宗伯曰國主山川故山摧川竭君爲
之不舉樂降服乘縵祝幣以禮焉梁晉所主也晉侯
從之故得無害漢文帝元年四月齊楚地二十九山
同日摧水大出令郡國無來獻施惠於天下遠近歡
洽亦不爲災也漢靈帝時青蛇見御座晉惠帝時大
蛇長三百步見齊地經市入廟中按蛇宜在草莽而
入市朝所以可爲怪今蛇見山澤蓋深山大澤必有
龍蛇亦不足怪也又山東足雨雖則其暈然陰慘過
久恐有冤獄伏願科省係囚庶幾或當天意且妖不

勝德惟修德可以消變太宗然之遣使者分道賑恤
餓人申理獄訟多所原免

王元感爲四門博士表上所撰尚書紕謬十卷春秋
振滯二十卷禮記絕愆三十卷并所注孝經史記藁
草詔令弘文崇賢兩館學士及成均博士詳其可否
學士祝周欽明郭山暉李憲等皆專守先儒章句深
譏元感掎摭獲義元感隨方應荅竟不肯屈鳳閣舍
人魏知古司封郎主徐堅左史劉知幾右史張思敬
雅好異聞每爲元感申理其義

陳少遊幼聰辯初習莊列等道經崇玄館學生衆推

引講經時同列有私習經義者期昇坐日相問答及公會少遊攝齊登堂音韻清辨觀者屬目所引文句悉問他義諸生不能對甚爲大學士陳希列所歎賞王起爲翰林侍講學士文宗尤好儒術每御長生殿對起訪以疑事至於郊祀刑法之間起盡能質之以開悟焉

鄭澣爲翰林侍講學士文宗以十九書語類親自發問澣應對無滯

恩獎

王者修國經立民紀將使風化歸厚德禮惇洽未有不本於墳籍始於學較者焉良以開物成務垂教作程爲先哲之極摯致治之要道也乃有被儒服究聖言或研幾一經或該通羣典達前人之闡奧爲諸生之師法剖析疑論導宣奧旨啓發後生成就學者以致膺問難於帝右參講授於儲邸入傳嚴掖專誨宗室謹官聳以宿業形譔次而垂訓道義兼精望實增茂故當世之君隆其體貌異其名數或親臨於庠序或召見於清閒或旌以章綬或厚於賜予待遇殊特褒揚備至雖復淪逝益加追獎誠以化民成俗實本於儒術厲世摩鈍無越於聳典豈獨寵異乎老成固

將敦勸乎禮俗者矣

漢梁丘賀受京房易宣帝時待詔黃門數入說教侍

中為諸侍中說以召賀賀入說帝善之以賀為郎

後漢桓榮為博士建武中光武幸太學會諸博士論

難於前桓榮被服儒衣溫恭有蘊藉蘊藉猶言寬博有餘也辯

明經義每以禮讓相厭不以辭長勝人儒者莫之及

厭服也特加賀賜又詔諸生雅吹擊磬盡日乃罷

戴憑為侍中正旦朝賀百寮畢會光武令羣臣能說

經者更相難詰義有不通輒奪其席以益通者憑遂

重坐五十餘席故京師謂之語曰解經不窮戴侍中

在職十八年卒於官詔賜東園梓器錢二十萬

高詡世傳魯詩徵為博士建武十一年拜大司農在

朝以方正稱十三年卒官賜錢及家田

劉昆受施氏易於沛人戴賓建武二十二年入授皇

太子及諸王小侯五十餘人二十七年拜騎都尉三

十年以老乞骸骨詔賜雒陽第舍以千石祿終其身

鍾興字次文汝南汝陽人也少從少府丁恭受嚴氏

春秋恭薦興學行高明光武召見問以經義對甚明

帝善之拜郎中

張酺字孟侯少從祖父充受尚書又事太常桓榮聚

徒以百數明帝爲四姓小侯置五經師酺以尚書教授數講於御前以論難當意除爲郎賜車馬衣裳遂令入授皇太子

魏應以建初四年拜五官中郎將經明行脩弟子自遠方至著錄數千人章帝甚重之數進見論難於前特受賞賜

召訓習韓詩博通書傳爲左中郎將入授諸王章帝嘉其義學恩寵甚崇出拜陳留太守賜刀劍錢物

賈逵爲郎章帝好古文尚書左氏傳詔逵入講北宮白虎觀南宮雲臺帝善逵說使逵會出左氏傳大義

長於二傳者於是具條奏之帝嘉之賜布五百疋衣一襲逵母嘗有疾帝欲加賜以較書例多特以錢二十萬使潁陽侯馬房與之謂房曰賈逵母病此子無人事於外屢空則從孤竹之子於首陽山矣

魯丕爲中散大夫和帝因朝會召見諸儒時與侍中

賈逵尚書令黃香等相難數事帝善丕說罷朝特賜

冠幘履襪衣一襲

宋登少傳歐陽尚書順帝時爲尚書僕射帝以登明識禮樂使持節臨太學奏定典律拜侍中

晉陳壽以儒學徵爲陳留內史累遷燕王師傳撰周

禮評甚有條貫行於世武帝泰始中詔曰燕王師陳
壽清貞潔靜行著邦族篤志好古博通六籍耽悅典
誥老而不倦宜在左右以篤儒教可爲給事中
杜夷爲國子祭酒辭疾未嘗朝謁元帝建武中令曰
國子祭酒杜夷安貧樂道靜志衡門日不暇給雖原
憲無以加也其賜穀二百斛皇太子三至夷第執經
問義夷雖逼時命亦未嘗朝謁國有大政嘗就夷諮
訪焉明帝卽位夷自表請退詔曰先王之道將墜於
地君下帷研思今之劉楊縉紳之徒景仰軌訓豈得
高退而朕靡所取則大寧元年卒年六十六贈大鴻

臚謚曰貞

梁伏曼容字公儀初仕宋爲驃騎行參軍明帝好周
易集朝臣於清暑殿講詔曼容執經曼容素美風采
帝以方嵇叔夜使吳人陸探微畫叔夜像以賜之
朱异年二十一爲楊州議曹從事史五經博士明山
賓表薦之武帝召見使說孝經周易義甚悅之謂左
右曰朱异實異後見明山賓謂曰卿所舉殊得其人
仍召异直西省

顧越爲安西湘東王府參軍越徧該經藝深明毛詩
旁通異義特善莊老武帝嘗於重雲殿自講老子僕

射徐勉舉越論義越抗首而請音嚮若鐘容止可觀
帝深贊美之由是擢為中軍宣成王記室參軍
陳張幾梁大同中召補國子正言生梁武帝嘗於文
德殿釋乾坤文言幾與陳郡袁憲等預焉勅令論議
諸儒莫敢先出幾乃整容而進諮審循環辭令溫雅
梁武帝甚異之賜裙襦絹等仍云表卿稽古之力幾
累遷士林館學士簡文在東宮出土林館發孝經題
經幾論義往復甚見嗟賞自是每有講集必遣使召
幾後魏李先明元帝卽位為博士召先讀韓子連珠
論二十二篇太公兵法十一事詔有司曰先所知者

皆軍國大事自今嘗宿於內賜先絹五十疋絲五十
斤雜絲五十疋御馬一疋拜安東將軍壽春侯賜隸
戶二十二

孫惠蔚為皇宗博士侍講東宮遷國子祭酒秘書監
仍知史事宣武延昌二年追賞侍講之勞封棗強縣
開國男食邑二百戶

崔逸孝文時為國子博士每有公事逸嘗被詔獨進
博士特命自逸始

王神貴為符璽郎時太學博士房景光作五經疑問
百餘篇神貴答之名辨疑前廢帝時奏上之帝親自

執卷與神貴往復嘉其用心特除神貴子鴻彥爲奉朝請

北齊張雕遍通五經尤明三傳高祖召入霸府令與諸子講後爲瑯琊王博士未幾拜散騎掌侍值武成侍講馬敬德卒乃入授經書帝甚重之以爲侍讀與張景仁並被尊禮同入華光殿共讀春秋加國子祭酒假儀同三司待詔文林館尋除侍中開府奏度支事大被委任言多見從特勅奏事不趨呼爲博士李鉉爲國子博士廢帝之在東宮文帝詔鉉以經入授甚見優禮數年病卒特賜廷尉少卿及還葬故郡

太子致祭奠之禮并使王人將送儒者榮之

張景仁以學書爲業工草隸後主在東宮時令侍書歷太子門大夫員外散騎掌侍諫議大夫後主登祚除通直散騎掌侍及奏御筆點出通字遂正掌侍在左右與語猶稱博士

後周熊安生爲國子博士時高祖入鄴安生遽令掃門家人怪而問之安生日周帝重道尊儒必將見我矣俄而高祖幸其第詔不聽拜親執其手引與同坐謂之曰朕未能去兵以此爲愧安生日黃帝尚阪泉之戰况陛下恭行天討乎高祖又曰齊民賦役繁興

竭民財力朕救焚拯溺思革其弊欲以府庫及三臺雜物散之百姓公以為何如安生曰昔武王克商散鹿臺之財發鉅橋之粟陛下此詔異代同美高祖又曰朕何如武王安生曰武王伐紂懸首白旗陛下平齊兵不血刃愚謂聖畧為優高祖大悅賜帛三百疋米三百石宅一區并賜象笏及九鑲金帶自餘什物稱是

隋楊尚希年十一入太學專精不倦周太祖嘗親臨釋奠尚希時年十八令講孝經詞旨可觀太祖奇之賜姓普六茹氏擢為國子博士

房暉世傳儒學為國子博士仁壽中卒官時年七十二朝廷嗟惜焉賻賜甚厚贈散騎常侍

楊汪為國子祭酒煬帝令百寮親學與汪講論皆不能屈帝令御史書其問答奏之省而大悅賜良馬一匹

元善為國子祭酒高祖嘗親臨釋奠命講孝經於是敷陳義理兼之以諷諫帝大悅曰聞江陽之說

元善爵為

江陽縣公更起朕心賚絹百疋衣一襲

唐魏徵為秘書監撰羣書政要貞觀五年奏上太宗覽之稱善勅皇子諸王各傳一本賜證帛二百疋

孔穎達爲國子祭酒太宗幸國學觀釋奠命穎達講孝經旣畢穎達上釋奠頌手詔答曰省所上頌殊爲佳作循題發函情辭爛其盈目啓封申紙逸氣飄以凌雲驪龍九重不足方斯綺麗威鳳五彩無以比其鮮華揚雄揆天高縱何遠黃香日下茂軌猶存尋讀周環彌覺欣翫卿夙挺珪璋早標令譽網羅百氏包括六經思涌珠泉情抽蕙圃關西孔子更起乎方今濟南伏生重興乎茲日庶令引四科於縑帙闡百遍於青襟翰苑詞林卿其首之也

貞觀十五年十月左僕射申國公高士廉等撰文思博要一千二百卷上之太宗有詔藏之秘府士廉以下加級頒賜各有差

陸德明爲國子博士撰經典釋文太宗悅而甚重之時德明已卒賜其家布帛二百段

顏師古爲中書侍郎受詔刊正經籍太宗善之賜帛五十疋

顏揚庭爲符璽郎永徽三年上其父故秘書監師古所撰刊謬正俗八卷高宗令付秘閣仍賜帛五十疋長孫無忌爲太尉顯慶三年脩新禮成詔中外頒行焉無忌等加爵賜帛等各有差

張大安爲太子左庶子初皇太子賢招集當時學者
大安及洗馬劉訥言雒州司戶參軍格希玄等注范
曄後漢書表上之賜物三萬段仍以其書付秘閣
王元感濮州鄆城人則天長安三年上表進其所撰
尚書糾謬十卷春秋振滯二十卷禮記繩愆三十卷
并所注孝經史記藁草請官給紙筆寫上秘閣詔曰
王元感質性溫敏博聞強記手不釋卷老而彌篤倚
前達之失究先聖之旨是謂儒宗不可多得可授太
子司議郎

褚無量爲國子員外司業兼修文館學士玄宗在春
宮授國子司業兼皇太子侍讀睿宗太極元年皇太
子幸國學觀釋奠令無量講孝經禮記各隨端立禮
博而且辨觀者歎服焉旣畢進授銀青光祿大夫兼
賜以章服并綵絹百段至玄宗開元三年遷右散騎
嘗侍兼國子祭酒無量之母死贈物一百段以無量
文儒之宗寵之也申命杭州刺史薛瑩就其家弔焉
服闋召拜左散騎嘗侍復爲侍讀以其年老每隨使
出入特許緩步又爲造腰輦令內給事舁於內殿無
量頻上書陳時政得失多見納用又嘗手勅褒美賜
物二百段七年詔太子就國子監行齒胄之禮無量

登座說經百寮並集行禮訖賞賜甚厚及卒贈禮部尚書賜物四百段米粟四百石

徐堅爲集賢院學士開元中勅堅等纂經史要事及歷代文章以類相從欲令皇子簡事綴文玄宗自定名爲初學記撰成以獻帝稱善賜堅等絹百疋穆元休以文學著稱嘗撰洪範外傳十篇開元中獻之玄宗賜帛授偃師丞

沈浩隱居四明山肅宗乾元二年進廣孝經十卷授秘書郎集賢殿待詔仍賜綠袍牙笏

袁頤爲國子博士貞元十二年卒德宗謂宰臣曰袁頤深於六經今之碩儒良可惜也特贈國子司業令中使賫告身及絹五十疋就宅宣暢并給傳令達故里

肅公肅爲秘書著作郎注太宗帝範一十二篇上獻德宗有詔付集賢仍令別寫一本進內賜公肅錦綵一百疋

李渤爲左拾遺罷官閑居東維撰禦戎新錄貳十卷以獻憲宗元和九年四月壬午詔曰前左拾遺內供奉李渤隱居求志殫見洽聞嘗致弓旌之招尚懷林壑之戀而聞肆其素業成此新書詞章典雅謀議深

遠獻于闕下良所嘉焉故洽今恩用清舊議可授秘書省著作郎

韋處厚路隋並為翰林侍講學士穆宗長慶三年撰六經法言二十卷表獻之帝覽其書稱善者久之賜處厚隋錦綵二百疋銀器二事隋自司勳郎中為諫議大夫依前充侍講學士處厚賜紫金魚袋錫服遷官皆以撰六經法言獎之

鄭澣為翰林侍講學士文宗命撰經史要錄十二卷書成帝加其精博因以十九書語類帝親自發問澣應對無滯賜以金紫

嚴厚本為國子監周易博士大和八年七月召本對於浴堂門賜其錦器

李宗閔為集賢大學太和九年五月進五堂傳賜宗閔等九人錦綵銀器有差

周田敏為國子祭酒廣順三年獻印版九經書五經文字太祖優詔嘉之賜襲衣繒綵銀器又賜司業趙銖襲衣繒綵

冊府元龜

學較部

卷之六十一

[Faint vertical text in columns, mostly illegible]

冊府元龜

淮南李嗣京參閱

西極文翔鳳訂正

豫章黃國琦較釋

學較部

六

奏議

夫輔世明教實本於儒術化民成俗莫先於學較自漢氏之後經藝寢盛官守並建職業咸舉故方聞之士彬彬就列器識宏遠議論深厚而或慮教道之中廢形於歎憤援古議以為請臻夫體要咸能剖析前

訓敷陳要道周旋感激曲暢元本誠以致治之成法
 稽古之大倫宜建首善尊立太學至於崇先聖之祀
 行齒胄之禮推擇師範廣樹徒衆申之課試大明黜
 陟考正疑志區別部類贊述章句購求遺逸斯皆敦
 益世教恢啓聖政豈徒專達詞雅以矜乎多聞者哉
 漢公孫弘武帝時以治春秋爲丞相以爲學官道之
 鬱滯廼請曰丞相御史言此以下皆弘奏請之辭制曰蓋聞導
 民以禮風之以樂風化也婚姻者居室之大倫也倫理也
 今禮廢樂隳朕甚愍焉故詳天下方聞之士咸登諸
 朝詳悉也方道也道道及博聞之士也其令禮官勸學講論洽聞舉遺

典以爲天下先大嘗議予博士弟子崇鄉里之化以

厲賢材焉

厲勸勉之也十日祗厲勉也自此上弘所引詔文

詔與大嘗臧博

士平等議

臧孔臧也平史闕其姓

曰聞三代之道鄉里有教夏

曰較殷曰序周曰庠

較教也言可效道藝也

其勸善也顯之朝

廷其懲惡也加之刑法故教化之行也建首善自京

師始繇內及外今陛下昭至德開大明配天地本人

倫勸學興禮崇化屬賢以風四方太平之原也

風化也

古者政教未洽不備其禮請因舊官而興焉爲博士

官置弟子五十人復其身大嘗擇民年十八以上儀

狀端正者補學士弟子郡國縣官有好文學敬長上

肅政教順鄉里出入不悖悖乖也所聞令相長丞上屬

所二千石聞謂聞其部屬有此人也令縣令相侯相長縣長丞縣丞也二千石謂郡守及諸王

也相二千石謹察可者嘗與計偕隨上計吏俱至京師詣大嘗得

受業如弟子一歲皆課能通一藝以上補文學掌故

缺其高弟可以為郎中大嘗籍奏為各籍而奏即有秀才

異等輒以名聞其不事學若下材及不能通一藝罷

之而請諸能稱者謂列其能通藝業而稱任者奏請補用之也臣謹按詔

書律令下者下謂班行也明天人之際通古今之誼文章

爾雅訓辭深厚爾雅近正也言詔辭雅正而深厚也恩施甚美小吏淺

聞弗能究宣亡以明布諭下以治禮掌故以文學禮

義為官遷留滯言治禮掌故之官本以有文學舉習禮義而為之又所以遷擢留滯之人

請選擇其秩比二百石以上及吏百石通一藝以上

補左右內史大行卒史左右內史後為左馮翊右扶風而大行後為大鴻臚也

皆百石以下補郡太守卒史皆各二人內地之郡郡各補太守卒

史二邊郡一人先用誦多者不足擇掌故以補中二

千石屬屬亦曹史令縣令文書解言屬其申也文學掌故補郡屬備員

擢之非藉其實用請著功令新立此條請以著於功令功令篇各若令選舉

也令它如律令此外並如舊律令制曰可自此以來公卿大夫

士吏彬彬多文學之士矣

後漢陳元以父任為郎建武初元與桓譚杜林鄭興



俱爲學者所宗時議欲立左氏傳博士范升奏以爲左氏淺末不宜立元聞之乃詣闕上疏曰陛下撥亂反正文武並用深愍經藝謬雜真僞錯亂每臨朝日輒延羣臣講論聖道知丘明至賢親受孔子而公羊穀梁傳聞於後世故詔立左氏博訪可否示不專已盡之羣下也今論者沉溺所習翫守舊聞執虛言傳受之辭以非親見實事之道左氏孤學少與遂爲異家之所覆冒夫至音不合衆聽故伯牙絕絃至寶不同衆好故卞和泣血仲尼聖德而不容於世况於竹帛餘文其爲雷同者所排固其宜也非陛下至明孰

能察之臣元竊見博士范升等所議奏左氏春秋不可立及太史公違戾凡四十五事按升等所言前後相違皆斷截小文媒黷微辭以年數小差掇爲詎謬遺脫纖微指爲大尤搜瑕求釁掩其弘美所謂小辨破言小言破道者也升等又曰先帝不以左氏爲經故不置博士後主所宜因襲臣愚以爲若先帝所行而後主必行者則盤庚不當遷于殷周公不當營雒邑陛下不當都山東也往者孝武皇帝好公羊衛太子好穀梁有詔太子受公羊不得受穀梁孝宣皇帝在人間時聞衛太子好穀梁於是獨學之及卽位爲

石渠論而穀梁氏興至今與公羊並存此先帝後帝各有所立不必其相因也孔子曰純儉吾從衆至於拜下則違之夫明者獨見不惑於朱紫聽者獨聞不謬於清濁故離朱不爲巧眊移目師曠不爲新聲易耳方今干戈少弭戎事畧戢留意聖藝眷顧儒雅採孔子拜下之義萃淵聖獨見之旨分明白黑建立左氏解釋先聖之積結兆汰學者之累惑使基業垂於萬世後進無復狐疑則天下幸甚臣元愚鄙嘗傳師言如得以褐衣召見俯伏庭下誦孔氏之正道理丘明之宿寃若辭不合經事不稽古退就重誅雖死之

日猶生之年也書下其議范升復與元相辨難凡十餘上帝卒立左氏學大帝選博士四人元爲第一帝以元新分爭乃用其次司隸從事李封於是諸儒以左氏之立論議謹譁自公卿以下數庭爭之會封病卒左氏復廢

朱浮光武建武中爲大僕以國學旣興宜廣博士之選乃上書曰夫大學者禮義之官教化所繇興也陛下尊敬先聖垂意古典宮室未飭干戈未休而先建大學造立黌舍比日車駕親臨觀享將以弘時雍之化顯勉進之功也尋博士之官爲天下宗師使孔聖

之言傳而不絕舊事策試博士必廣求詳選爰自畿
 夏延及四方是以博學明經惟賢是登學者精勵遠
 近同慕伏聞詔書更試五人惟取見在雒陽城者臣
 恐自今以往將有所失求之密邇容或未盡而四方
 之學無所勸樂凡策試之本貴得其真非有期會不
 及遠方也又諸所徵試皆私自發遣非有傷費煩擾
 於事也語曰中國失禮求之於野臣浮幸得與講圖
 讖故敢越職帝然之

范升為博士

費直字長翁善易長於卦筮

詔下其議建武四年正

月朝公卿大夫博士見於雲臺帝曰范博士可前乎
 說升起對曰左氏不祖孔子而出於丘明師徒相傳
 又無其人且非先帝所存無因得立遂與韓歆及大
 中大夫許淑等互相辨難日中乃罷升退而奏曰臣
 聞主不稽古無以承天臣不述舊無以奉君陛下愍
 學微缺勞心經藝情好博聞故異端競進近有司請
 置京氏易博士羣下執事莫能據正京氏既立費氏
 怨望左氏春秋復以此類亦希置立京費已行次復
 高氏春秋之家又有騶夾如令左氏費氏得置博士
 高氏騶夾五經奇異並復求立各有所執乖戾分爭

從之則失道不從則失人將恐陛下必有厭倦之聽
 孔子曰博學約之弗叛矣夫夫學而不約必叛道也
 顏淵曰博我以文約我以禮孔子可謂知教顏淵可
 謂善學矣老子曰學道日損損猶約也又曰絕學無
 憂絕末學也今費左二學無有本師而多反異先帝
 前世有疑於此故京氏雖立輒復見廢疑道不可由
 疑事不可行詩書之作其來已久孔子尚周流遊觀
 至於知命自衛反魯乃正雅頌今陛下草創天下紀
 綱未定雖設學官無有子弟詩書不講禮樂不脩奏
 立左費非政急務孔子曰攻乎異端斯害也已傳曰

聞疑傳疑聞信傳信而堯舜之道存願陛下疑前帝
 之所疑信先帝之所信以示反本明不專已天下之
 事所以異者以不一本也易曰天下之動貞夫一也
 又曰正其本萬事理五經之本自孔子始謹奏左氏
 之失凡四十事特難者以太史公多引左氏升又上
 太史公違戾五經謬孔子言及左氏春秋不可錄三
 十一事詔以下博士

徐防明帝永平十四年拜司空防以五經久遠聖意
 難明宜為章句以悟後學上疏曰臣聞詩書禮樂定
 自孔子發明章句始於子夏其後諸家分拆各有異

說仲尼沒而微言絕七十子喪而大義乖漢承議秦

經典廢絕本文畧存或無章句收拾缺遺建立明經

博徵儒術開置太學武帝時開學官置博士弟子員也孔聖既遠微

旨將絕故立博士十有四家光武中興恢興稽古易有施子梁丘賀京房書

有歐陽和伯夏侯勝建詩有申公韓固韓嬰春秋有

韓彭祖顏安樂禮有戴經戴聖凡十四博士太常遣

選有聰明威重一人設甲乙之科前書曰歲課甲科

為祭酒總領紀綱也科二十人為太子舍人丙以勉勸學者所以示人好

惡改做就善者也伏見太學試博士弟子皆以意說

不脩家法諸經為業各有名家私相容隱開生姦路每有策試

輒與爭訟論議紛錯互相是非孔子稱述而不作但述

先聖之言不自制作又曰吾猶及史之闕文古者史官于書事有不知則闕以待

能者孔子言吾少時猶及見古史官疾史有所不知

而不知闕也今不依章句妄生穿鑿以遵師為非義

意說為得理輕侮道術寢以成俗誠非詔書實選本

意改簿從忠三世嘗道夏之政忠忠之敝小人以野

人以鬼故周人承之以文文之敝小人以僣故救僣

以忠三王之道若循環周而復始史記僣或作簿

專精務本儒學所先臣以為博士及甲乙策試宜從

其家章句開五十難以試之解釋多者為上第引文

明者為高說若不依先師義有相伐伐謂自相攻伐也皆正

以為非五經各取上第六人論語不宜射策雖所失



或父差可矯革東觀記防上疏曰試論語本文章句但通度勿以射策與令學者務本有所一心專精師門思核經意事得其實道得其真於此弘廣經術尊重聖業有益於化雖從來久大經衰微學問寢淺誠宜及時改矯其失詔書下公卿皆從防言

賈逵章帝時為郎入講北宮白虎觀南宮雲臺帝善達說使發出左氏傳大義長於二傳者逵於是具條奏之曰臣謹摘出左氏三十事尤著明者斯皆君臣之正義父子之紀綱其餘同公羊者十有七八或文簡小異無害大體至如祭仲紀季伍子胥叔術之屬左氏義深於君父公羊多任於權變其相殊絕固以甚遠而冤抑積以莫肯分明臣以永平中上言左氏

與圖讖合者先帝不遺芻蕘省納臣言寫其傳誥藏之秘書建平仲侍中劉歆欲立左氏不先暴論大義而輕移太尊恃其義長詆挫諸儒諸儒不服相與排之孝哀皇帝重逆衆心故出歆為河內太守從是攻擊左氏遂為重讎至光武皇帝奮獨見之明興立左氏穀梁會二家先師不曉圖讖故令中道而廢凡所以存先王之道者要在安上理民也今左氏崇君父卑臣子強榦弱枝觀善戒惡至明至切至貞至順且三代異物損益隨時故先帝博觀異家各有所採易有施孟復立梁丘尚書歐陽復有小大夏侯今三傳

之異亦猶是也又五經家皆無以證圖讖明劉氏以爲堯後者而左氏獨有明文五經家皆言顓頊代黃帝而堯不得爲火德左氏以爲少昊代黃帝卽圖讖所謂帝宣也如今堯不得爲火則漢不得爲赤其所發明補益實多陛下通天然之明見大聖之本改元正歷垂萬世則是以麟鳳百數家瑞雜還猶朝夕恪勤遊情六藝研幾綜微靡不審覈若復留意廢學以廣聖見庶幾無所遺失矣書奏帝嘉之賜布五百疋衣一襲若魯丕和帝時爲中散大夫時侍中賈逵薦丕道藝深明宜見任用帝因朝會召見諸儒丕與逵

及尚書令黃香等令相難數事帝善丕之說特賜冠幘履襪衣一襲丕因上疏曰臣以愚頑顯備大位犬馬氣衰猥得進見論難於前無所甄明衣服之賜誠爲優遇臣聞說經者傳先師之言非從已出不得相讓相讓則道不明若規矩權衡之不可枉也難者必明其據說者務立其義浮華無用之言不陳於前故精思不勞而道術愈章法異者各令自說師法博觀其義覽詩人之旨意察雅頌之終始明舜禹臯陶之相戒顯周公箕子之所陳觀乎人文化成天下陛下旣廣納謇以開四聰寧令芻蕘以言得罪旣顯崑穴

以求仁賢無使幽遠獨有遺失

樊淮安帝時補尚書郎鄧太后臨朝儒學陵替淮乃上疏曰臣聞賈誼有言人君不可以不學故雖大舜聖德孜孜爲善成王賢主崇明師傅故光武皇帝受命中興羣雄分擾旌旗亂野東西誅戰不遑啓處然猶投戈講藝息馬論道至孝明皇帝兼天地之資用日月之明庶政萬幾無不簡心而垂情古典游意經藝每饗射禮畢正佐自講諸儒並聽四方欣欣雖闕里之化矍相之事誠不足言又多徵名儒以充禮官如沛國趙孝瑯瑯承宮等或安居結駟告歸鄉里或

豐衣博帶從見宗廟其餘以經術皆優者布見廊廟故朝夕皤皤之良華首之老每宴會則論難衍衍共求政化詳覽羣言響如振玉朝者進而思政罷者退而備問小大隨化雍雍可嘉期門羽林介冑之士悉通孝經博士議郎一人開門徒衆百數化自聖躬流及蠻荒匈奴遣伊秩訾王大車且渠來入就學八方肅清上下無事是以議者每稱盛時咸言永平今學者蓋少遠方尤甚博士倚席不講儒者競論浮麗忘謇謇之忠習譏諫之辭文吏則去法律而學詆欺銳錐刀之鋒斷刑辭之重德陋俗薄以政苛刻昔孝文

竇后性好黃老而清淨之化流景武之間臣愚以爲宜下明詔博求幽隱發揚巖穴寵進儒雅有如孝廉者徵詣公車以俟聖上講習之期公卿各舉明經及舊儒子孫進其爵位受續其業復召郡國書佐使讀律令如此則延頸者日有所見傾耳者月有所聞伏願陛下推述先帝進業之道太后深納其言是後屢舉方正敦樸仁賢之士

翟酺順帝時爲將作大匠上言孝文皇帝始置一經博士武帝大合天下之書而孝宣論六經於石渠學者滋盛弟子萬數光武初興愍其荒廢起太學博士舍內外講堂諸生橫卷爲海內所集明帝時辟雍始成欲毀太學太尉趙熹以爲大學辟雍皆宜兼存故並傳至今而頃者頽廢至爲園採芻牧之處宜更修繕誘進後學帝從之遂起太學更開括房室學者爲酺立碑銘於學

魏劉靖文帝時爲大司農衛尉上疏陳儒訓之本曰夫學者治亂之軌儀聖人之大教也自黃初以來崇本太學二十餘年而成者蓋寡繇博士選輕諸生避投高門弟子恥非其倫故學者雖有其名而無其實雖設其教而無其功宜高選博士取行爲人表經任

人師者掌教國子依遵古法使二千石以上子孫年從十五皆入大學明制黜陟榮辱之路其經明修行者則進之以崇德荒教廢業者則退之以懲惡舉善而教不能則勸浮華交游不禁自息矣闡弘大化以綏來賓六合承風遠人來格此聖人之教致治之本也

高柔明帝時爲博士執經又上疏曰臣聞遵道重學聖人洪訓褒文崇儒帝者明經昔漢末陵遲禮樂隳壞雄戰虎爭以戰陣爲務遂使儒林之羣幽隱而不顯太祖初興閱其如此在於撥亂之際並使郡縣立

教學之官高祖卽位遂闡其業興復辟雍州立課試於是天下之士復開庠序之教親俎豆之禮焉陛下臨政允迪敷哲敷弘大猷光濟先軌雖夏啓之承基周成之繼業誠無以加也然今博士皆經明行脩一國清選而使遷除限不過長懼非所以崇顯儒術帥勵怠惰也孔子稱舉善而教不能則勸故楚禮申公學士銳精漢隆卓茂縉紳競慕臣以爲博士者道之淵藪六藝所宗宜隨學行優劣待以不次之位敦崇道教以勸學者於化爲弘帝納之

晉載邈懷帝永嘉中爲征南軍司于時凡百草創學

較未立邈上疏曰臣聞天道之所大莫大於陰陽帝王之至務莫重於禮學是以古之建國有明堂辟雍之制鄉有庠序黌較之儀皆所以抽道幽滯啓廣才思蓋以六四有困蒙之吝君子大養正之功也昔仲尼列國之大夫耳興禮脩學於洙泗之間四方髦俊斐然向風身達者七十餘人自茲以來千載絕塵豈天下小於魯衛賢者之於曩時勵與不勵故也自項國遭無妄之禍社稷有綴旒之危寇羯飲馬於長江竟狡鴟張於萬里遂使神州蕭條鞠於茂草四海之內人迹不交霸王有旰食之憂黎元懷荼毒之苦戎

馬交集於中原何遑邊豆之事哉然三年不爲禮禮必壞三年不爲樂樂必隳况曠載累紀如此之久焉今未進後生日不覩揖讓升降之儀耳不聞鐘鼓管絃之音文章散滅圖讖無遺此蓋聖達之所深悼有識之所嗟歎也夫治世尚文遭亂尚武文武通用久長之道譬之天地昏明交迭自古以來未有不由于者也今或以天下未一非興禮學之時此言似之而不期然夫儒道深奧不可倉卒而成古之俊又必三年而通一經此天下泰平然後脩之則功成事定誰與制禮作樂者哉又貴遊之子未必有斬將搴旗之

才亦未有從軍征戍之役不及盛年講隸道義使明珠加磨瑩之功荆璞發採琢之榮不亦良可惜乎臣愚以世喪道久人情玩於所習純風日去華競日彰猶火之消膏而莫之覺也今天下告始萬物權輿聖朝以神武之德值革命之運蕩近世之流敝繼千載之絕軌篤道崇儒創立大業明主唱之於上宰輔督之於下夫上之所好下必有過之者焉是故雙劍之節崇而飛白之俗成挾琴之容飭而赴曲之和作君子之德風小人之德草實在感之而已臣以闇淺不能遠識格言奉誦明令慷慨下風謂以三時之隙漸就脩建疏奏納焉於始脩禮學

王導元帝初遷驃騎軍將領中書監于時軍旅不息學較未修導上書曰夫治化之本在於正人倫人倫之正存乎設庠序庠序設五教明德禮洽通彞倫攸敘有恥且格也父子兄弟夫婦長幼之序順而君臣之義固矣易所謂正家而天下定者也故聖王蒙以養正少而教之使化沾肌骨習以成性遷善遠罪而不自知行成德立而後裁之以位雖王之嫡子猶與國子齒使知道而後貴其取才用事咸先本之于學故周禮卿大夫獻賢能之書于王王拜而受之所以

尊道而貴士也人知士之所貴繇乎道存則退而脩其身脩其身以及其家正家以及於鄉學於鄉以登於朝反本復始各求諸已敦素之業著浮薄之道息教始然也故以之事君則忠用之蒞下則仁卽孟軻所謂未有仁而遺其親義而後其君者也自項皇綱失統禮教陵替頌聲不作于今二紀傳曰三年不爲禮禮必壞三年不爲樂樂必隳而况如此其久者乎先進漸忘揖讓之容後生惟聞金革之響干戈日尋俎豆不設先王之道彌遠華僞之風遂滋非所以習民靖俗揣本抑末之謂也殿下以命世之資屬傾危

之運禮樂征伐翼成中興將滌穢蕩瑕撥亂反正誠宜經綸稽古達明學較闡揚六藝以訓後生使文武之道墜而復興方今小雅盡廢戎虜扇熾節義陵遲國恥未雪忠臣義士所以扼腕禮樂政刑當竝陳以俱濟者也苟禮義膠固純風載洽則化之所陶者廣而德之所被者大義之所屬者深而威之所振者遠矣由斯而進則可朝服濟河使帝典闕而復補王綱弛而更張饗餐改情獸心革面揖讓而蠻夷服綏帶而天下從得乎其道者豈難也哉故有虞舞干戚而三苗化魯僖作泮宮而淮夷服桓公之霸皆先教而

後戰今若聿遵前典復道教使朝之子弟並入于學
選明博修禮之士而爲之師化成俗定莫尚於斯帝
納之

荀崧元帝時爲太常時方修學較簡省博士置周易
王氏尚書鄭氏古文尚書孔氏毛詩鄭氏周官禮記
鄭氏春秋左傳杜氏服氏論語孝經鄭氏博士各一
人凡有九人其儀禮公羊穀梁及鄭易皆省不置崧
以爲不可乃上疏曰自喪亂以來儒學尤寡今處學
則闕朝廷之秀士朝則廢儒學之俊昔咸寧太康元
康永嘉之中侍中嘗侍黃門通洽古今行爲世表者

領國子博士一則應對殿堂奉酬顧問二則叅訓國
子以弘儒訓三則祠儀二曹及太常之職以得質疑
今皇朝中興美隆往初宜憲章令軌祖述前典世祖
武皇帝應運登禪崇儒興學經始明堂營建辟雍告
朔班政鄉飲大射西閣東序河圖秘書禁籍臺省有
宗廟大府金庸故事太學有石經古文先儒典訓賈
馬鄭杜服孔王何顏尹之徒章句傳注衆家之學置
博士十九人九州之中師徒相傳學士如林猶選張
華劉實居太常之官以重儒教傳稱孔子沒而微言
絕七十二子喪而大義乖自頃中夏殄瘁講誦遏密

斯文之道將墜于地陛下聖哲龍飛恢崇道教樂正雅頌於是乎在江楊二州先漸聲教學士移文于今爲盛然方疇昔猶遷之一臣學不章句才不弘通方之華實儒風殊邈思竭駑駘增萬分願斯道隆於百世之上縉紳永於千載之下伏聞節省之置皆三分置二博士舊置十九人今五經合九人准古計今猶未能半宜及省節之制以時施行今九人以外猶宜增四願陛下萬幾餘暇時垂省覽宜爲鄭易置博士一人鄭宜禮博士一人春秋公羊博士一人穀梁博士一人昔周之衰下陵上替上無天子下無方伯

善者誰賞惡者誰罰孔子懼而作春秋諸侯忌妬懼犯時禁是以微辭妙旨義不顯明故曰知我者其惟春秋罪我者其惟春秋時左丘明子夏造膝親受無不精究孔子既沒微言將絕於是丘明退撰所聞而聞之傳其書善禮多膏腴美辭張本繼末以發明經義信多竒偉學者好之稱公羊高親受子夏立於漢朝辭義清俊斷決明審董仲舒之所善也穀梁赤師徒相傳暫立於漢世向歆漢之碩儒猶父子各執一家莫肯相從其書文清義約諸所發明或是左氏公羊所不載亦足有所取正是以三傳並行於先代通

才未能孤廢今去聖久遠其文將墮與其過廢寧與過立臣以爲三傳雖同曰春秋而發端異趣按如三家異同之說此乃義則戰爭之場辭以劔戟之鋒於理不可得共博士宜各置一人以博其學詔曰崧表如此皆經國之務爲政所由息馬投戈猶可講藝今雖日不暇給豈忘本而遺存邪可共博士議者詳之議者多請從崧所奏詔曰穀梁膚淺不足置博士餘如奏會王敦之難不可應詹元帝時爲後軍將軍上疏曰性相近習相遠訓導之風宜慎所好魏正始之間蔚爲文林元康以來賤經尚道以玄虛宏放爲夷

達以儒術清儉爲鄙俗永嘉之弊未必不由此也今雖有儒官教養未備非所以長育人材納之軌物也宜修辟雍崇明教義先令國子受訓然後皇儲親臨釋奠則普天尚德率土知方矣帝雅重其才深納之袁環成帝時咸康中爲國子祭酒于時喪亂之後禮教陵遲環上疏曰臣聞先王之教也崇典訓以弘遠大明禮學以流後生所以道萬物之性暢爲善之道也宗周旣興文史載煥端委垂於南蠻頌聲溢於四海故延陵聘魯聞雅而嘆韓起過魯觀易而美何者立人之道於斯爲首孔子恂恂以教洙泗孟軻係之

誨誘無倦是以仁義之聲于今猶存禮讓之節時或有之疇昔皇運陵替喪亂屢臻儒林之教漸頽庠序之禮有闕國學索然墳籍莫啓有心之徒抱志無由昔魏武帝身親介冑務在武功猶尚廢鞍覽卷投戈吟咏况今陛下以聖明臨朝百官以虔恭蒞事朝野無虞江外謐靜如之何泱泱之風漠焉無聞洋洋之美墜於聖世乎古人有言詩書義之府禮樂德之則實宜留心經籍闡明學義使諷誦之音盈於京室味道之賢是則是詠豈不盛哉若得給其宅第備其學徒博士僚屬粗有其官則臣之願也疏奏帝從之國學之興自環始也

謝石孝武帝太原初爲尚書上疏曰立人之道曰仁與義翼善輔性惟禮與學雖理出自然必須誘導故洙泗闡弘道之風詩書垂軌教之典敦詩悅禮王化以須而隆甄陶九流羣生於是乎穆世不甞治道亦時亡光武投戈而習誦魏武息馬以脩學懼墜斯文若此之至也大晉受命值世多阻雖聖化日融而王道未備庠序之業或廢或興遂令陶鑄闕日用之功民性靡素絲之益豐豐玄緒翳焉莫抽臣所以遠尋伏念寤寐永歎者也今皇威遐震戎車方靜將灑玄

風於四區導斯民於至德豈可不弘敷禮樂使煥乎
可觀請興復國學以訓胄子班下州郡普脩鄉較雕
琢琳瑯和寶必至大啓羣蒙茂茲成德匪懈于事必
由之以道則人競其業道隆學備矣帝納其言

殷茂爲國子祭酒時選公卿二千石子弟爲學生增
造廟屋一百五十五間而品課無章士君子恥與其
列茂言之曰臣聞弘化正俗存乎禮教輔性成德必
資於學先王所以陶鑄天下津梁萬物閑邪納善潛
被於日用者也故能疏通玄理窮綜幽微一貫古今
彌綸治化且夫子稱回以好學爲本七十希聖以善

誘歸宗雅頌之音流詠千載聖賢之淵範哲王所同
風自大晉中興肇基江左崇明學較脩建庠序公卿
子弟竝入國學尋值多故訓業不終陛下以聖德玄
一思隆前美順通居方導達物性興復儒肆筵與後
生自學建彌年而功無可名憚業避就存者無幾或
假託親疾真僞難知聲實渾亂莫此之甚臣聞舊制
國子生皆冠族華胄比列皇儲而中者混雜蘭艾遂
令人情恥之子貢欲去告朔之餼羊仲尼猶愛其禮
况名實兼喪面牆一世者乎若以當今急病未遑斯
典權宜停廢者別一理也若其不然宜依舊准竊謂

臣內外清官子侄普應入學制以程課今者見生或
年在扞格方圓殊趣宜聽其去就各從所安所上謬
合乞付外參議孝武下詔褒納又不施行

李遼清河人孝武時上表曰臣聞教者治化之本人
倫之始所以誘達羣方進德興仁譬諸土石因陶冶
成器雖復百王殊禮質文參差至於斯道其用不爽
自中華湮沒闕里荒毀先王之澤寢聖賢之風絕自
此迄今將及百年造化有零否終有泰河濟夷徙海
岱清及徘徊天邑感戀罔極乞臣表付外參議又不
見省

冊府元龜 終

冊府元龜

淮南李嗣京叅閱

西極文翔鳳訂正

豫章黃國琦較釋

學校部 七

奏議第二

宋范泰爲國子祭酒時高祖初受命議建國學泰上
表曰臣聞風化興於哲王敦倫表於盛世至悅莫先
講習甚樂必寄朋來古人成童入學易子而教尋師
無遠負糧忘艱安親光國莫不由禮此若能出不由

戶則斯道莫從是以明詔爰發已成渙汗學制既下
遠近遵承臣之愚懷少有未達今惟新告始盛業初
基天下收觀有志景慕而置生之制取少停多開不
來之端非一途而已臣以家推國則知所聚不多恐
不足以宣大宋之風引濟濟之美臣謂合選之家雖
制所未達父兄欲其入學理合開通雖小爲晨昏所
以大引孝道不修春秋則所陷或大故趙盾忠而書
弑許止孝而得罪於斯爲戒可不懼哉十五志學誠
有其文若年降無幾而深有志向者何必限以一格
而不許其進邪楊鶚豫玄實在弱齒五十學易乃無

大過昔中朝助教亦用二品潁川陳載以辟大保掾
而國子取爲助教卽大尉淮之弟所貴在於得才無
繫於定品教學不篤獎勵不著今有職閑而學優者
可以本官領之門地堪二品宜以朝請領助教旣可
以甄其名品斯以敦學之一隅其二品才堪自依舊
從事會今生徒有期而學較未立覆篲實望其速向
輒已淹其遲事有以賒而宜急者殆此之謂古人重
寸陰而賤尺璧其道然也時學竟不立

梁周弘正累遷國子博士啓武帝周易疑義凡五十
條又請釋乾坤二繫曰臣聞易稱立象以盡意繫辭

以盡言然後知聖人之情幾乎不可見矣自非含微體極盡化窮神豈能通志成務探賾致遠而宣尼之比桎梏絕帛編於漆字軒轅之所聽瑩遷玄珠於赤水伏惟陛下下日萬幾匪勞神於瞬息凝心妙本嘗自得於天真聖智無以隱其幾深明神無以輸其不測至若爻畫之苞於六經文辭之窮其兩繫名儒劇談以歷載鴻生抵掌以經年莫有試遊其藩未嘗一見其族自制旨降談裁成易道折至理於秋毫渙層水於幽谷臣親承音旨職司宣授後進誦誦不無傳業但乾坤之蘊未割繫表之妙莫銓使一經深致尚

多所惑臣不揣庸淺輕率短陋謹與受業諸生清河張武等三百一十二人於乾坤二繫象爻未啓伏願聽覽之閑曲垂提訓得使微臣鑽仰成其篤習後昆好事專門有奉自惟多幸俱沐道於堯年肄業終身不知老之將至詔答曰設卦觀象事遠文高作繫表言辭深理奧東魯絕編之思西北幽憂之作事逾三古六更七聖自商瞿稟承子庸傳受篇簡湮沒歲月遼遠田生表淄川之譽梁丘擅瑯琊之學代郡范生山陽王氏人藏荆山之寶各盡玄言之趣說或去取意有詳畧近縉紳之學咸有稽疑隨答所問已具別

解如與張武等三百一十二人頌釋乾坤文言及二
繫萬幾小暇試當討論

陳沈不害文帝天嘉初爲衡陽王府中記室叅軍兼
嘉德殿學士自梁季喪亂至是國學未立不害上書
曰臣聞立人建國莫尚於尊儒成俗化民必崇於教
學固東膠西序事隆乎三代環林璧水業盛於兩京
自淳源旣遠澆波已扇物之感人無窮人之遂欲無
節是以設訓垂範啓導心靈譬彼染藍類諸琢玉然
後人倫以睦卑高有序忠孝之理旣明君臣之道攸
固執禮自基魯公所以難侮歌樂已細鄭伯於是前

亡干戚舞而有苗至泮宮成而淮夷服長想洙泗之
風載懷淹稷之盛有國有家莫不尚矣梁太清季年
數鍾否剝夷狄外侵姦回內曩朝聞鼓鼙夕炤烽火
洪儒碩學解散甚於坑夷五典九丘湮滅逾乎帷蓋
成均自斯墜業瞽宗於是不修褒成之祠弗陳裸享
釋菜之禮無稱俎豆頌聲寂寞遂踰一紀後生敦悅
不見函丈之禮晚學鑽仰徒深避席之歎陛下繼曆
升統握鏡臨寓道洽寰中威加無外濁流已清重氛
載廓含生熙阜品庶咸亨宜其弘振禮樂建立庠序
式稽古典慎簡儒官選公卿國子皆入於學助教博

士朝夕講肄使擔簦負笈鏘鏘接衽方領矩步濟濟成林如切如磋聞詩聞禮一年可以功倍三冬於是足用故能擢秀雄州揚庭觀國人士登朝資優學以自輔蒞官從政有經業以治身轡駕列庭青紫拾地古者王世子之貴猶與國子齒降及漢儲茲禮不墜暨兩晉斯事彌隆所以見師嚴而道尊者也皇太子天縱生知無待審喻猶宜晦迹俯同專經請業奠爵前師肅若舊典昔闕里之堂草萊自闢舊宅之內絲竹流音前聖遺烈深垂警戒况復江表無虞海外有截豈得不開闡大猷恢弘至道寧可使玄教儒風弗

興聖世盛德大業遂蘊堯年臣末學小生詞無足算輕獻瞽言伏增悚惕詔答曰省表聞之自舊章弛廢微言將絕朕嗣膺寶業念在緝熙而兵革未息軍國草創嘗恐前世令典一朝泯滅卿才思優洽文理可求弘惜大體殷勤名教付外詳議依事施行

後魏高允爲中書令獻文初詔允曰自頃以來庠序不見爲日久矣道肆陵遲學業遂廢子衿之嘆復見於今朕旣纂統大業中外咸安稽之舊典欲置學宮於郡國使進修之業有所津竒卿儒宗元老朝望舊德宜與中秘二省參議以聞允表曰臣聞經綸大業

必以教養爲先咸秩九疇亦由文德成務故辟雍光於周詩泮宮顯於魯頌自永嘉以來舊章殄滅鄉閭無雅誦之聲京邑絕釋奠之禮道業陵夷百五十載仰惟先朝每欲憲章昔典經闡儒風方事尚殷弗遑克服陛下欽明文思纂成洪業萬國咸寧百揆時序申祖宗之遺志興禮樂之絕業爰發德音惟新文教縉紳黎獻莫不幸甚臣承旨勅竝集二省披覽使籍備究典紀靡不敦儒以觀其業貴學以篤其道伏思明詔玄同古義宜如聖旨營建學校以勵風俗使先王之道光演於明時郁郁之音流聞於四海請制大

郡立博士二人助教四人學生一百人次郡博士一人助教二人學生八十人中郡博士一人助教二人學生六十人下郡立博士一人學生四十人其博士取博閱經典世履忠清堪爲人師者年限四十以上助教亦與博士同年限三十以上通業夙成才任教授不拘年齒學生取郡中清望人行脩謹堪循名教者先進高門次及中第獻文從之郡國立學自此始也

鄭道昭孝文時爲國子祭酒上表曰臣竊以爲崇治之道必也須才養才之要莫先於學今國子學堂房

粗置生誦闕爾城南太學漢魏石經丘墟殘毀黎藿
榛蕪遊兒牧豎爲之歎息有情之輩實亦悼心况臣
親司而不言露伏願天慈廻神紆盼賜垂覽察若臣
微意萬一合允重勅尚書門下考論營制之模則三
雍可翹立而興毀銘可不日而就樹舊經於帝京播
茂範於不朽斯有天下者之美業也不從道昭又表
曰臣聞唐虞啓運以文德爲本殷周刑治以道藝爲
先然則禮樂者爲國之基不可斯須廢也是故周敷
文教四海宅心魯秉周禮強齊歸義及至戰國紛紜
干戈通用五籍灰焚羣儒坑殄賊仁義之經貴戰爭

之術遂使天下分離黔黎塗炭數十年間民無聊生
者斯之由矣爰暨漢祖於行陣之中尚優引叔孫通
等光武中興於撥亂之際乃使鄭衆范昇較書東觀
降逮魏晉何嘗不殷勤於篇籍篤學於戎伍伏惟大
魏之興也雖羣凶未殄戎馬在郊然猶招集英儒廣
開學較用能闡道義於八荒布盛德於萬國教靡不
懷風無不偃今者乘休平之基開無疆之祚定鼎伊
瀝惟新寶曆九服感至德之和四垠懷擊壤之慶而
蠢爾閩吳阻化江湫先帝爰震武怒戎車不息而停
鑿佇蹕留心典墳命故御史中尉臣李彪與吏部尚

書任城王澄等妙選英儒以崇文教澄等依旨置四門博士四十人其國子博士太學博士及國子助教宿已簡置伏尋先時意存速就但軍國多事未遑營立自邇迄今垂將一紀學宮凋落四術寢廢遂使碩儒耆德卷經而不談俗學後生遺本而逐未進競之風實由於此矣伏惟陛下欽明文思玄鑒洞達越會未款務脩道以來之遐方後服敷文教而懷之垂心經素優悠墳籍將使化越軒唐德隆虞夏是故屢發中旨敦營學館房宇既脩生徒未立臣學陋全經識蔽篆素然往年刪定律令謬預議筵謹依准前修尋

訪舊事參定學令事訖封呈自邇迄今未蒙報判但廢學歷年經術淹滯請學令并制早勅施行使選授有依生徒可准詔曰具卿崇儒敦學之意良不可言新令尋班施行無遠可謂職思其憂無曠官矣道昭又表曰竊惟鼎遷中縣年將一紀縉紳褫業俎豆闕聞遂使濟濟明朝無觀風之美非所以光國宣風納民軌物臣自往年以來頻請學令竝置生員前後累上未蒙一報故當以臣職淺濫官無能有所感悟者也館學既修生房粗構博士見員足可講習雖新令未頒請依舊權置國子學生漸開訓業使播教有章

儒風不墜後生覩徙義之機學徒崇知新之益至若孔廟既成釋奠告始揖讓之容請俟令出不報

孫惠蔚宣武初爲秘書丞既入東觀見典籍未周乃上疏曰臣聞聖皇之御世也必幽贊人經參天貳地憲章典故述導鴻猷故易曰觀乎天文以察時變觀乎人文以化成天下然則六經百氏圖書秘籍乃承天之正術治人之真範是以溫柔疏達詩書之教恭儉易良禮樂之道爰豸以精微爲神春秋以屬辭爲化故大訓炳於東序藝文光於麟閣斯實太平之樞宗勝殘之要道有國之靈基帝王之盛業安上靖民

敦風美俗其在茲乎及秦棄學術禮經泯絕漢興求訪典文載舉先王遺典燦然復存暨光武撥亂日不暇給而入雜之書二千餘兩魏晉之世尤重典墳收亡集逸九流咸備觀其鳩閱史篇訪購經論紙竹所載畧盡無遺臣學闕通儒思不及遠徒循章句片義無立而茲造典章厠斑秘省忝官承乏惟書是司而觀閣舊典先無定目新故雜揉首尾不全有者累帙數十無者曠年不寫或篇第褫落始末淪殘或文壞字誤譌爛相屬篇目雖多全定者少臣今依前丞臣盧昶所撰甲乙新錄欲裨殘補缺損併有無較練句

讀以爲定本次第均寫永爲常式其秘省先無本者
廣加推尋搜求令足然經記浩博諸子紛綸部軼旣
多章篇紕繆當非一二較書歲月可了今求令四門
博士及在京儒生四十人在秘書省專較精考叅定
字義如蒙聽許則典文允正羣書大集詔許之
南安王禎之子英宣武時爲吏部尚書奏謹按學令
許州郡學生三年一較所通經數因正使列之然後
遣使就郡練考臣伏惟聖明崇道顯成均之風蘊義
光膠序之美是以大學之館久置於下國四門之教
方稱於京里許習訓淹年聽授累紀然雋造之流應

升於魏闕不革之輩宜返於齊民頃以皇都遷構江
陽未一故鄉較之訓弗遑上請致薰蕕之質均誨學
庭蘭蕭之體等教文肆令外宰京官銓考向訖求遺
四門博士明通五經者道別較練依令黜陟詔曰學
業墮廢爲日已久非一朝能勸此當別勅

劉芳爲侍中領國子祭酒宣武時芳上表曰夫爲國
家者罔不崇儒尊道學較爲先成復政有質文茲範
不易諒由萬端茲始衆務所稟故也唐虞已往典籍
無據隆周已降任居虎門周禮大司徒云師氏掌以
媥詔王居虎門之左司王朝

虎門路寢之門王視朝於門外畫虎爲司王朝

言察王之視朝也

掌國中央之事以教國子弟

中失謂中禮及失禮者

蔡氏勸學篇云周之師氏居虎門左敷陳六藝以教國子今之祭酒卽周師氏雒陽記國子學官與天子對太學在開陽門外按學記云古之王者建國君民教學爲先鄭氏注云內則設師保以教使國子學焉外則有太學庠序之官由斯而言國學在內太學在外明矣按如雒陽記猶有仿像臣愚謂今旣徙縣崧瀍皇居伊雒宮闕府寺僉復故址至於國學豈可外替校量舊事應在宮門之左右至如太學基所炳在仍舊營構又去太和二十年發勅立四門博士於四

門置學臣按自周以來學惟有二或尚西或尚東或貴在國或貴在郊爰暨周室學蓋有六師氏居內太學在國四小在鄉郊禮記云周人養庶老於虞庠虞庠在國之西郊禮又云天子設四學當入學而太子齒注云四學周四郊之虞庠也按大戴保傳篇云帝入東學尚親而貴仁帝入南學尚齒而貴信帝入西學尚賢而貴德帝入北學尚貴而尊爵帝入太學承師而問道周之五學於此彌彰按鄭注學記周則六學所以然者法云內則設師保以教使國子學焉外則有太學庠序之官此其正也漢魏已降無復四郊

謹尋先時宜在四門按王肅注云天子四郊有學去
王都五十里考之鄭氏不云遠近今太學故坊基址
寬曠四郊別置相去遼濶簡督難周計太學坊并作
四門猶爲太廣以臣愚量同處無嫌且今時置制多
循中代未審四學應從吉否求集儒禮官議定其所
從之遷中書令祭酒如故

崔光孝明時爲車騎大將軍領國子祭酒上表曰詩
稱蔽芾甘棠勿剪勿伐召伯所茇又云雖無老成人
尚有典刑傳曰思其人猶愛其樹况用其道而不卹
其人是以書始稽古易本山泉觀於天文以察時變

觀於人文以化天下孟子覈實衡向計說安氏記篋
於汾南伯山抱卷於河右元始孤論充漢帝之坐孟
皇片字懸魏王之帳前哲之寶重墳典珍愛分篆猶
若此之至也矧迺聖典鴻經炳勒金石理爲國楷義
成家範迹實世模事則人執千載之格言百王之盛
烈而令焚荒汙毀積榛棘而弗掃廳廳之所栖宿童
豎之所登踞者哉誠可爲痛心疾首拊膺扼腕伏惟
皇帝陛下孝敬日休自天縱睿垂心初學儒業方熙
皇太后欽明慈淑臨制統化崇道重教留神翰林將
披雲臺而問禮拂麟閣以招賢誠宜將開闕里清彼

孔堂而使近在城闈面接宮廟舊較爲墟子矜永替
豈所謂建國君民教學爲先京邑翼翼四方是則也
尋石經之所起自炎劉繼以曹氏論初乃三百餘載
計未向二十紀矣昔來雖屢經戎亂猶未大相傾如
聞往者刺史臨州多構圖寺道俗諸用稍有發掘基
蹠泥灰或出於此皇都始遷尚可補復軍國務殷遂
不存簡官私顯隱漸加剝徹播麥納菽秋春相因閉
生蒿杞時致火燎由是經石彌滅文字增缺職忝曹
教參掌經訓不能繕修頽墜興復生業倍深慚恥今
來遣國子博士一人堪任幹事者主周視驅禁田收

制其踐穢科閱碑牒所失次第量厥補綴詔曰此乃
學者之根原不朽之永格垂範將來憲章之本便可
一依公表光乃令國子博士李郁與助教韓神固劉
燮等勘較石經其殘缺者石功并字多少欲補治之
於後靈太后廢遂寢

羊深前廢帝時爲散騎常侍兼侍中是時膠序廢替
名教陵遲深乃上疏曰臣聞崇禮建學列代之所循
尊經重道百王所不易是以均塾洞啓昭明之頌載
揚膠序大闕郁穆之詠斯顯伏惟大魏乘乾統物欽
若奉時模唐軌虞率由前訓重以高祖累聖垂衣儒

風載蔚得才之盛如彼薪蕪固以追隆周而竝驅駕
炎漢而獨邁宣皇下武式遵舊章用能榆揚盛烈聿
修厥美自茲已降世極道消風猷稍遠澆薄方競退
讓寂寥地競靡節進必吏能外非學藝是使刀筆小
用計日而期榮專經大才甘心於陋巷然治之爲本
斯貴得賢苟值其人豈拘葷簡三代兩漢異世間出
或釋褐中林鬱登卿尹或投竿釣渚徑升公相事炳
丹青義在往策悠哉邈乎不可勝紀竊以今之所用
弗修前矩至如當世通儒冠之盛德見徵不過四門
登庸不越九品以此取士求之濟治譬猶却行以及

前之燕而向楚積習之不可者其所由來漸矣昔魯
興泮宮頌聲爰發鄭廢學較國風已譏將以納民軌
物莫始於經禮菁莪育才義光於篇什自兵亂以來
垂將十載于戈日陳俎豆斯闕四海荒涼民物凋弊
名教頓虧風流殆盡世之陵夷可爲歎息陛下中興
纂歷理運惟新方隅稍厚實惟文德但禮賢崇讓之
科治世未備還淳反朴之化起言斯穆夫先黃老而
退六經史遷終其成蠹貴玄虛而賤儒術應氏所以
亢言臣雖不敏敢忘前載且魏武在戎尚修學較宣
尼推論造次必儒臣愚以爲宜重修國學廣延胄子

使函丈之教日聞釋奠之禮不闕并詔天下郡國興立儒教考課之程咸依舊典苟經明行脩宜擢以不次擢斗筭喋喋之才進大雅汪汪之德博收鴻生以光顧問繫維奇異共精得失使寰區之內競務仁義之風荒散之餘漸知禮樂之用豈不美哉臣誠聞短敢慕前訓用稽古義上塵聽覽伏望陛下垂就日之監齊非煙之化儻以臣言可採乞特施行廢帝善之北齊邢邵西魏出帝時爲國子祭酒與楊愔魏文請置學奏曰二黷兩學之盛虞殷所以宗配上帝以著莫大之嚴宣布十二彰則天之軌養黃髮以詢哲言

育青衿而敷典教用能享國長久風徽萬祀者也爰暨亡秦改革其道坑儒滅學以蔽黔黎故九服分離祚終二代炎漢勃興更脩儒術故西京有六學之義東京有三本之盛逮自魏晉撥亂相因兵革之中學較不絕仰惟高祖孝文皇帝稟聖自天道鏡今古列教序於鄉黨廓詩書於郡國但經始事殷戎軒屢駕未遑多就弓劍弗追世宗統曆聿遵先緒永平之中大興板築續以戎馬生郊雖逮爲山還停一簣而明堂禮樂之本乃鬱荆棘之林膠序德義之基空盈牧豎之迹城隍嚴固之重闕磚石之工墉構顯望之要

少樓榭之飾加以風雨稍侵漸致虧墜非所謂追隆
堂構儀刑萬國者也伏聞朝儀以高祖大造區夏道
侔姬文擬祀明堂式配上帝今若基地不修仍同畎
澮即使高皇神享闕於國陽崇事之典有聲無實此
臣子所以匪寧億兆無所停望也臣又聞官方受能
所以任事既任事矣酬之以祿如此則上無曠官之
譏下絕尸素之謗今國子雖有學官之名無教授之
實何異兔絲燕麥南箕北斗哉昔劉向有言王者宜
興辟雍禮樂以風天下夫禮樂所以養人刑法所以
殺人而有司勤勤請定刑法至於禮樂則曰未敢敢

於殺人不敢於養人也臣以為當今四海清平九服
寧晏經國要重理應先營脫復稽延則劉向之言徵
矣但事不兩興須有進退以愚量之宜罷上方彫美
之作頗省永寧土木之工并減瑤光材瓦之力兼分
石窟鑄琢之勞停諸事役非世急者三時農隙修此
數條使辟雍之禮蔚爾而復興誦諷之音煥然而更
美崇榭高墉巖壯於外槐宮棘寺顯嚴於中更明古
今重遵鄉飲廓遠郡學精課經業如此則元凱可得
之於上序游夏可致之於下國豈不休歟靈太后令
曰配饗大禮為國之本比以戎馬在郊未遑脩繕今

四海晏寧當勅有司別議經始

隋牛弘高祖開皇初爲秘書監以典籍未備上表請開獻書之路曰經籍所興由來尚矣爰書肇於庖羲文字生於蒼頡聖人所以弘宣道教博通古今揚於王庭肆於時夏故堯稱至聖猶考古道而言舜其大智尚觀古人之象周官外史掌三皇五帝之志武王問皇帝顓頊之道太公曰在丹書是知握符御曆有國家者曷嘗不以詩書而爲教因禮樂而成功也昔周德旣衰舊經紊棄孔子以大聖之才開素王之業憲章祖述制禮刪詩正五始而修春秋闡十翼而弘

易道治國立身作範垂法及秦皇馭寓吞滅諸侯任用威力事不師古始下焚書之令行偶語之刑先王墳籍盡皆掃地本旣先亡從而顛覆臣以圖讖言之經典盛衰信有徵數此則書之一厄也漢興改秦之弊敦尚儒術建藏書之策置較書之官屋壁山巖往往間出外有太常太史之藏內有延閣秘書之府至孝成之世亡逸尚多遺謁者陳農求遺書於天下詔劉向父子讎較篇籍漢之典文於斯爲盛及王莽之末長安兵起宮室圖書竝從焚燼此則書之二厄也光武嗣興九重經誥未及下車先求文雅於是鴻生

鉅儒繼踵而集懷經負帙不遠斯至肅宗親臨講肆
和帝數幸書林其蘭臺石室鴻都東觀秘牒填委更
倍於前及孝獻移都吏民擾亂圖書縑帛皆取爲帷
囊所收而西裁七十餘乘屬西京大亂一時播蕩此
則書之三厄也魏武代漢更集經典皆藏在秘書內
外三閣遣秘書郎鄭默刪定舊文時之論者美其朱
紫有別晉氏承之文籍尤廣晉秘書監荀勗定魏內
經更著新簿雖古人舊簡猶云有缺新章後錄鳩集
已多足得恢弘正道訓範當世屬劉氏憑陵京華覆
滅朝章國典從而失墜此則書之四厄也永嘉之後

寇竊競興因河據雒跨秦帶趙論其建國立家而傳
名號憲章禮樂寂滅無聞劉裕平姚泓收其圖籍五
經子史纔百千卷皆赤軸青紙文字古拙僭偽之盛
莫過二秦以此而論足可明矣故知衣冠軌物圖畫
記注播遷之餘皆歸江左晉宋之際學藝爲多齊梁
之間經史彌盛宋秘書丞王儉依劉氏七畧撰爲七
志梁人阮孝緒亦爲七錄總其書數三萬餘卷及侯
景渡江破滅梁室秘省經籍雖從兵火其文德殿內
書史宛然猶存蕭繹據有江陵遣將破平侯景收王
儉之書及公私典籍重本七萬餘卷悉送荊州故江

表圖書因斯盡萃於繹矣及周師入郢繹悉焚之於外城所收十纜一二此則書之五厄也後魏爰自幽方遷宅伊雜日不暇給經籍闕如周氏創基關右戎車未息保定之始書止八千後加收集方盈萬卷高氏據有山東初亦採訪驗其本目殘缺猶多及東夏初平獲其經史四部重雜三萬餘卷所益舊書五千而已今御書單本合一萬五千餘卷部帙之間仍有殘缺比梁之舊日止有其半至於陰陽河雒之篇醫方圖譜之說稱復爲少臣以經書自仲尼已後迄於當今年逾千載數遭五厄興集之期屬膺聖世伏惟

陛下受天明命君臨區宇功無與二德冠往初自華夏分離藝倫攸斁其間雖霸王遍起而世難未夷欲崇儒業時或未可今土宇邁於三王民黎盛於兩漢有人有時正在今日方當大弘文教納俗昇平而天下圖書尚有遺逸非所以仰協聖情流訓無窮者也臣史籍是司寢興懷懼昔陸賈奏漢祖云天下不可馬上治之故知經邦立政在於典謨矣爲國之本莫此攸先今秘藏見書亦足披覽但一時載集須令大備不可王府所無私家乃有然士民殷雜采訪難知縱有知者多懷恡惜必須勒之以天威引之以微利

若猥發明詔兼開購賞則異典必臻觀閣斯積重道之風超於前世不亦善乎伏願天鑒少垂炤察帝納之於是下詔獻書一卷賚縑一疋一二年間篇籍稍備

抑昂爲上開府時高祖受禪昂見天下無事可以勸學行禮因上表曰臣聞帝王受命建學制禮故能移既往之風成惟新之俗自魏道將謝分割九區關右山東久爲戰國各逞權詐俱殉干戈賦役繁重刑政嚴急蓋救焚拯溺無暇從容非朝野之願以至於此晚世因循遂成希慕俗化澆弊流宕忘反自非天然

上哲挺生於時則儒雅之道綱禮之制衣冠民庶莫肯用心世事所以未清軌物由茲而壞伏惟陛下稟靈上帝受命昊天合三陽之期應千祀之運往者周室傾毀區宇沸騰聖冊風行神謨電發端座廊廟蕩滌萬方俯順幽明君臨四海擇萬古之典無善不爲改百王之弊無惡不盡至若因循緣義爲其節文故以三百三千事高前代然下土黎獻尚未盡行臣謬蒙獎策從政藩部人庶軌儀實見多闕儒風以墜禮教猶微是知百姓之心未能頓變仰惟深思遠慮清念下民漸被以儉使至於道臣恐業淹事緩動延年

世若行禮勸學道教相催必當靡然向風不遠而就
家知禮節人識義方比屋可封輒謂匪遠帝覽而善
之

劉炫開皇中與諸儒脩定五禮授旅騎尉開皇二十
年廢國子四門及州縣學惟置太學博士二人學生
七十二人炫上表言學較不宜廢情理甚切高祖不
納

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

學較部

奏議第三

唐房玄齡太宗時為左僕射貞觀二年十二月與國
子博士朱子奢建議云武德中詔釋奠於太學以周
公為先聖孔子配享臣以周公尼父俱稱聖人庠序
置奠本緣夫子故晉宋梁陳及隋大業故事皆以孔

冊府元龜 學較部

卷之六十三

丘爲先聖顏回爲先師歷代所行古今通允伏請停祭周公升夫子爲先聖以顏回配享詔從之

許敬宗爲太子右庶子簡較中書侍郎貞觀二十年詔曰左丘明卜子夏公羊高穀梁赤伏勝高堂生戴聖毛萇孔安國劉向鄭仲杜子春馬融盧植鄭玄服虔何休王肅王弼杜預范甯賈逵總二十四座春秋二仲行釋奠之禮初以儒官自爲祭主直云博士姓名昭告于先聖又州縣釋奠亦以博士爲主敬宗奏曰按禮記文王世子凡學官春釋奠於先師鄭注云官謂詩書禮樂之官也彼謂四時之學將習其道故

儒官釋奠各於其師旣非國學行禮所以不及先聖至於春秋二時合樂之日則天子視學命有司典禮卽總祭先聖先師焉秦漢釋奠無文可簡至於魏武則使太嘗行事自晉宋已降時有親行而學官主祭全無典實且名稱國學樂用軒懸尊俎威儀蓋皆官備在於臣下理不合專况凡在小神猶皆遣使行禮釋奠旣准中祀據理必須稟命今請國學釋奠令國子祭酒爲初獻祝詞稱皇帝謹遣仍令司業爲亞獻其諸州刺史爲初獻上佐爲亞獻博士爲終獻縣學縣令爲初獻丞爲亞獻博士旣無品秩諸主簿及尉

通爲終獻若有闕竝以次差攝州縣釋奠旣請刺史縣令親獻主祭望准祭社同給明衣脩附禮令以爲永則

長孫無忌爲太尉高宗顯慶二年七月十一日議曰按新禮孔子爲先聖顏回爲先師又准貞觀二十一年以孔子爲先聖更以左丘明等二十二人與顏回俱配尼父於太學竝爲先師今據永徽令聞改用周公爲先聖遂黜孔子爲先師顏回丘明竝爲從祀謹按禮記云凡學春官釋奠於其先師鄭玄注曰官謂詩書禮樂之官也先師者若漢有高堂生樂有制氏

詩有毛公書有伏生可以爲師者又禮記曰始立學釋奠于先聖鄭玄注曰若周公孔子也據禮爲定昭然自別聖則非周卽孔師則偏善一經漢魏以來取舍各異顏回孔子互作先師宣父周公迭爲先聖求其節文遍有得失所以貞觀之末親降綸言依禮記之明文酌康成之輿說正夫子爲先聖加衆儒爲先師永垂制於後昆華往代之紕繆而今新令不詳制旨輒事刊改遂違明詔但成王幼年周公踐極制禮作樂功比帝王所以禹湯文武成王周公爲六君子又說明王孝道乃述周公嚴配此卽姬旦鴻業合同

王者祀之儒宮就享實貶其功仲尼生衰周之末極
 文喪之弊祖述堯舜憲章文武弘聖教於六經闡儒
 風於千世故孟軻稱生民以來一人而已自漢已降
 奕葉封侯崇奉其聖迄於今日胡可降茲上哲俯於
 先師且丘明之徒見行其學貶為從祀亦無故事今
 請改令從詔於義為允其周公仍依別禮配享武王
 詔從之

陳子昂梓周人則天光宅元年昂上疏曰臣竊獨有
 私恨者惟陛下之欲興崇大化而不知國家大學之
 廢積歲月久矣學堂荒穢畧無人蹤詩書禮樂罕聞

習者陛下明詔尚未及之愚臣所以私恨也臣聞天
 子立太學所以聚天下賢英為政教之首君臣上下
 之禮於是興焉揖讓尊俎之節於此生焉是以天子
 得賢臣由此也今則荒廢失之於本而求之於末豈
 可得哉君子三年不為禮禮必壞三年不為樂樂必
 隳奈何天子之政而輕禮樂哉陛下何不詔天子胄
 子使歸大學而習業乎斯亦國家之大務也

韋嗣立為鳳閣舍人聖曆二年十月嗣立上疏曰臣
 聞禮記曰化民成俗必由學乎學之於人其用益博
 故立太學以教於國設庠序以化於邑王之諸子卿



大夫士之子及國之俊選皆造焉故自天子至於庶人未有不須學而成者國家自永淳以來國學廢散胄子棄缺時輕儒學之官莫存章句之選貴門後進競以僥倖升班寒族嘗流復因凌替弛業考試之際秀茂罕登驅之臨人何以從政又垂拱已後文明在辰盛典洪休日書月至因籍際會入仕尤多陛下誠能下明制發德音廣開庠序大敦學校三館生徒卽令追集王公已下子弟不容別求仕進皆入國學伏膺訓典崇飾館廟尊尚儒師盛陳奠菜之儀宏敷講說之會使士庶觀聽有所發揚引獎道德於是乎在

則四海之內靡然何風矣

劉子玄玄宗開元初爲左庶子上孝經注義曰謹按俗所行孝經題曰鄭氏注爰在近古皆云鄭康成而魏晉之朝無有此說至江左晉穆帝永和十一年及孝武太元元年再聚羣臣共論經義有荀昶撰集孝經諸說始以鄭氏爲宗自宋梁以來多有異論陸澄以爲非玄所注請不藏於秘省王儉不依其請遂得見傳於時魏齊則立於學官著在律令蓋由魯俗無識故致斯訛舛然則孝經非玄所注其驗十有二條據鄭君自注云遭黨錮之事逃難注禮黨錮事解注



古文尚書毛詩論語爲表譚所逼未至元城乃注周易都無注孝經之文其驗一也鄭君卒後弟子追論師所注述及應對時文謂之鄭志其言鄭所注者惟有毛詩尚書周易都不言孝經其驗二也又鄭志目錄記鄭之所注五經之外有中侯書傳七政論乾象曆六藝論毛詩譜答臨碩難禮臨姓碩名時爲學官駁許慎異義發墨守箴膏肓及答甄子然等書寸紙片言莫不悉載若有孝經之注無容匿而不言其驗三也鄭之弟子教授門徒祖述師言更相問答編錄其語謂之鄭記惟載詩書禮易論語其言不及孝經其驗四也

趙商作鄭先生碑銘具稱諸所注義駁論亦不言注孝經晉中經簿周易尚書尚書中侯尚書大傳毛詩周禮儀禮禮記論語凡九書皆云鄭氏注名玄至於孝經則稱鄭氏解無名玄二字其驗五也春秋緯演孔圖云康成注三禮詩易尚書論語其春秋則有評論宋均詩緯序云先師北海鄭司農則均是玄之傳業弟子也師所注述無容不知云春秋孝經維有評論玄之不注於此特明其驗六也又宋均孝經緯注引鄭六藝論敘孝經云玄又爲之注司農論如是而均無聞焉有義無辭令余昏惑舉鄭之語而云無聞

其驗七也宋均春秋緯注云玄爲春秋孝經畧說則非注之謂所言玄又爲之注者汎辭耳非實事其序春秋亦云玄又爲之注寧可復責以實注春秋乎其驗八也後漢史書存於代者有謝承薛瑩司馬彪袁崧等其爲鄭玄傳者載其所注皆無孝經其驗九也王肅孝經傳首有司馬宣王之奏玄奉詔令諸儒注述孝經以肅說爲長若先有鄭注應言及而都不言鄭其驗十也王肅注書發揚鄭矩凡有小失皆在聖証若孝經此注亦出鄭氏被肅攻擊者最應煩多而肅無言其驗十一也魏晉朝賢辨論時事鄭氏諸注

無不得隱未有一言引孝經之注其驗十二也凡此証驗易爲討覈而代之學者不覺其非乘彼謬說競相推舉諸解不立學官此注獨行於代觀夫言語鄙陋義理乖疎固不可以示彼後來傳諸不朽如古文孝經孔傳本出孔氏壁中語甚詳正無俟商榷而曠代亡逸不復流行至隋開皇十四年侍書學生王孝逸於京市陳人處買得一本送與著作郎王邵以示河間劉炫仍令較定而此書更無兼本難可依憑炫輒以所見率意刊改因著古文孝經稽疑一篇以爲此書經文盡正傳義甚美而歷代未嘗置於學官良

可惜也然則孔鄭二家雲泥致隔今綸音發問較其短長愚請行孔廢鄭於義爲允又今俗所行老子是河上公注其序云河上公者漢文帝時人結草菴於河曲乃以爲號前所以注老子授文帝因冲空上天此乃不經之鄙言流俗之虛語按漢書藝文志注老子因二家河上所釋無聞焉爾豈非注者欲神其事故假造其說邪然其理乖謬雖使纔別朱紫粗分菽麥亦皆嗤其過謬而況有識者乎豈如王弼英才俊識曠微索隱考其所注義旨爲優必黜河上公昇王輔嗣在於學者實得其宜又按漢書藝文志易有十

三家而無子夏作傳者至梁阮氏七錄始有子夏易六卷或云韓嬰作或云丁寬作然據漢書藝文志韓易有二篇丁易有八篇求其符會則事殊曠刺者矣以東魯伏膺文學與子游齊列西河告老名行將夫子連蹤歲越千齡時經百代其所著述沉翳不行豈非後來假憑先哲亦猶石崇謬稱阮籍郭璞濫名周寶必欲行用深以爲疑子玄又上言曰臣才雖下劣而學實優長竊自不遜以爲近古已來未之有也當以鄭氏孝經河上公老子二書訛舛不足流行孔王兩家實堪師授每懷此意其願莫從伏見去月十日

勅令所司詳定四書得失具狀聞奏臣等草議請行
孔王二書牒禮部訖但今庸儒淺識聞見不周可與
共成難與慮始蓋孔父有言曰行夏之時乘殷之輅
服周之冕此則今古循環愚智往復豈前者必是而
後者獨非乎是以老篇莊子興於晉代公羊穀梁寢
於魏日春秋左氏因元凱而方著尚書孔傳至光伯
而始行斯皆尚好不同晚乃覺悟承習既久近輒弛
張伏惟開元皇帝陛下嘗以九重餘隙窮覽文藝百
氏詳觀游心經典爰降綸綍俯逮芻蕘臣輒以愚識
上符睿旨伏望明恩曲垂炤察如將爲允請卽班行

不可使隨流腐儒參論其義景寅中書門下奏曰劉
子玄奏注孝經請廢鄭依孔注老子請停河上公行
王易傳非子夏所造者子玄博識誠則純儒全非衆
家亦則未可且孝經鄭義行已多時老子河注用亦
云久并子夏易傳文不折於片言望竝付所司令諸
儒與子玄對質定必須理勝義成不得飾詞爭辨論
定聞奏是時尚書禮部奏議曰臣得國子博士司馬
貞等議稱今文孝經是漢河間王所得顏芝本劉向
以本參較古文省煩除惑定爲此一十八章其注相
承云是鄭玄所作而鄭志及目錄等不載故往賢共

疑焉惟荀昶范曄以爲鄭注故昶集解孝經具載此注而其事云以鄭爲主是先達博選以此注爲優且其注縱非鄭氏所作而義亦敷暢頗將爲得雖數處小有隱實亦未爽經通其古文二十二章元出孔壁先是安國作傳後遭巫蠱代未之行荀昶集注之時尚有孔傳中國遂亡其本近儒欲崇古學妄作此傳假稱孔氏輒穿鑿改更僞作闈門一章劉炫詭隨妄稱其善且闈門之義近俗之語必非仲尼正說按其章云闈門之內具禮矣乎嚴親嚴兄妻子臣妾繇百姓徒役之句凡鄙不合經典又分庶人章從故自天子已下別爲章乃加子曰二字然故者連上之詞旣爲章首不合言故是古文旣亡後人妄開此等數章以應二十二章之數非但經文不真抑亦傳文淺僞又注云因天之時就地之利暴其肌體朝暮從事露髮塗足少而習之其心安焉此語雖旁出諸子引之爲注何言之鄙俚乎與鄭玄所云分別五土視其高下高田宜黍稷下田宜稻麥優劣懸殊曾何等級今議者欲取近儒詭說殘經缺傳而廢鄭注理實未可望請准令式孝經鄭注與孔傳依舊俱行又得議稱老子道德者是謂玄言注家雖多罕窮厥旨河上蓋

老子道德者是謂玄言注家雖多罕窮厥旨河上蓋

愚虛之號漢史實無其人然其注以養神爲宗以無
爲爲體其詞近其理弘小足以脩身潔誠大可以寧
人安國故顧歎曰河上公雖曰注書卽史立教皆沒
畧遠體指明近用斯可謂知言矣王輔嗣雅善玄談
頗採道要窮神明乎橐籥守靜默於玄牝其理暢其
旨微在於玄學頗謂所長至若近人立教脩身弘道
則河上爲得今望請王河二注令學者俱行又得議
稱謹按劉向七畧有子夏傳但此書不行已久今所
存者多失真本又荀勗中經簿子夏傳四卷或云丁
寬所作是先達疑非子夏矣又隋書經籍志云子夏

傳殘缺梁氏六卷今兩卷是其書錯謬多矣王儉七
志引劉向七畧云易傳子夏韓氏而載薛虞記又今
秘庫有子夏傳薛虞記其傳文質畧指輒非遠無益
後學不可將帖正經伏奉今年三月十日勅曰孝經
者德教所先自則天以來獨宗鄭氏遺旨今則無文
又子夏易傳近無習者輔嗣注者亦甚甄明諸家所
傳玄有得失獨據人說能無短長令儒官詳定所長
令明經者依習若將理等亦可兼行其作易者兼帖
子夏易傳詳其可否奏聞者又奉四月九日勅曰太
子左庶子劉子玄奏孝經注請廢鄭依孔老子注請

停河上公行王輔嗣易傳非子夏所造者付臣所司
令諸儒與子玄對質定詳必須理勝義成不得飾詞
爭辨者臣等國子博士司馬貞太學博士郗暉通等
十人對如前子玄請依諸儒爲定
馬懷素開元初爲秘書監以書籍散逸條流無敘懷
素上疏曰南齊已前墳籍舊編王儉七志已後著述
其數盈多隋志所書亦未詳悉或古書近出前志闕
而未編或近人相傳浮詞鄙而猶記若無編錄難辨
淄澠望簡括近書篇目并前志所遺者續王儉七志
藏之秘府於是召學涉之士國子博士尹知章等分

部撰錄并刊正經史粗創首尾

李元瓘爲國子司業開元八年三月上言三禮三傳
及毛詩尚書周易等竝聖賢微旨生人教業必事資
經遠則斯道不墜今明經所習務在出身咸以禮記
文少人皆諳讀周禮經邦之軌則儀禮莊敬之楷模
公羊穀梁歷代宗習今兩監及州縣以獨學無友四
經殆絕旣事資訓誘不可因循其學生望請各量配
作業并貢人預試之日習周禮儀禮公羊穀梁竝請
帖十通五許其入策以此開勸卽望四海均習九經
該備從之又奏先聖孔宣父廟先師顏子配座今其

像立侍准禮授坐不立授立不跪况顏子道亞生知
才先入室既當配享其儀見立請據禮文合從侍坐
又四科弟子閔子騫等竝服膺儒術親承聖教復列
像廟堂不參享祀謹簡祠令何休范甯等二十二賢
猶沾從祀豈有升堂入室之子猶不沾配享之餘望
請春秋釋奠列享在二十二賢之上七十子文翁之
壁尚不缺如豈有國庠遂無圖繪請命有司圖形於
壁兼爲立贊庶敦勸儒風光崇聖列曾參孝道可崇
猶受經於夫子望准二十二賢預享從之

楊瑒爲國子祭酒開元十七年三月上言曰太學者
教人務禮樂敦詩書也古制卿大夫子弟及諸侯歲
貢小學之異者咸造焉故曰十五入大學學先聖禮
樂而知朝廷君臣之禮班以品類分以師長三德以
訓之四教以睦之人旣知勸且務通經學成業著然
後爵命加焉以之効職則知禮節以之蒞人使識廉
讓則械樸之咏興也伏聞承前之例監司每年應舉
者嘗有千數簡試取其尤精上者不過二三百人省
司重試但經明行脩卽與擢第不限其數自數年以
來省司定限天下明經進士及第每年不過百人兩
監惟得一二十人若嘗以此數而取臣恐三千學徒

虛廢官廩兩監博士濫縻天祿臣竊見流外入仕諸色出身每歲尚二千餘人方於明經進士多十餘倍自然服勤道業之士不及胥吏浮虛之徒以其効官豈識於先王之禮義國家大啓庠序廣置教道厚之以政始訓之以士先豈徒然哉將有以也陛下設學較務以勸進之有司爲限約務以黜退之臣之微誠實所未曉臣伏見承前以來制舉遁迹丘園孝悌力田者或試時務策一道或通一經粗明文義卽放出身亦有與官者此國家恐其遺才至於明經進士服道日久請益無倦經策旣廣文辭極難監司課試十

已退其八九考功及第十又不收其一二若長以爲限恐儒風漸墜小道將興若以出身人多應須諸色都減豈在獨抑明經進士也玄宗甚然之

歸崇敬爲國子祭酒兼集賢學士代宗大曆五年皇太子欲以仲秋之月於國學行齒胄之禮崇敬以國學及官名不稱請改國學之制兼更其名曰禮記王制曰天子學曰辟雍又五經通義云辟雍養老教學之所也以形制言之雍壅也辟璧也雍水環之圓如璧形以義理言之辟明也雍和也言以禮樂明和天下禮記亦謂之澤宮射義云天子將祭必將習射於

澤宮故前代文士亦呼云璧池亦曰璧沼亦謂之學
省後漢光武立明堂辟雍靈臺謂之三雍宮至明帝
躬行養老於其中晉武帝亦作明堂辟雍靈臺親臨
辟雍行鄉飲酒之禮又別立國子學以殊士庶永嘉
南遷惟有國子學不立辟雍北齊立國子寺隋初亦
然至煬帝大業十三年改爲國子監今國家富有四
海聲名文物之盛惟辟雍獨缺伏請改國子監爲辟
雍省又以祭酒之名非學官所宜按周禮師氏掌以
美詔王教國子請改祭酒爲大師氏立正三品又司
業者義在禮記云樂正司業長也言樂官之長司主

此業爾雅云大板謂之業按詩周頌設業設簾崇牙
樹羽則業是懸鍾磬之簨簾也今太學既不教樂於
義則無所取請改司業一爲左氏一爲右氏位正四
品上又以五經六籍古先哲王政理之式也國家創
業制取賢之法立明經發微言於衆學釋回增美選
賢與能自艱難以來取人頗易考試不求其文義及
第先取於帖經遂使顯門業廢請益無從師資禮虧
傳授義絕今請以禮記左傳爲大經周禮儀禮毛詩
爲中經尚書周易爲小經各置博士一員其公羊穀
梁文疏旣少請共准一中經通置博士一員所擇博

士兼通孝經論語依憑章疏講解分明注引旁通十問得九兼德行純潔文詞雅正儀刑規範可爲師表者令四品以上各舉所知在外者給驛年七十已上者蒲輪其國子太學四門三館各立五經博士品秩上下生徒之數各有差其舊博士助教直講經直及律館算館書館助教請皆罷省其教授之法學生置監謁同業師其所執贄假修一束清酒一壺布衫一段其色隨師所服出中門延入與坐割脩斟三爵而止乃發篋出經摠衣前請師爲依經辨理畧舉一隅然後就室每朝脯二時請益師亦二時居講堂說釋

道義發明大體兼教以文行忠信之道示以孝悌睦友之義旬省月試時考歲貢以生徒及第多少爲博士考課上下其有不率教者則夏楚扑之國子之不率教者則申禮部移爲太學生太學之不變者移爲四門四門之不變者復本役終身不齒雖率教九年而學不成者亦歸之州學其禮部考試之法請無帖經但於所習經中問大義二十得十八爲通兼論語孝經各問十得八兼讀所問文注義疏必令通熟者爲通一又於本經問時務策三道通三爲及第其中有孝行聞於鄉閭者舉解具言於習業之下省試之

日觀其所實義少兩道亦請兼收其天下鄉貢亦如之習業考試止於明經名得第者授官之資與進士同若此則教義日深而禮讓興別強不犯弱衆不暴寡此由太學中來者也詔下尚書集百寮定議以聞議者以爲省者禁也非外司所宜名周禮代掌其職者曰氏國學非代官不宜爲太師氏其餘大抵以俗習旣久重難改作其事不行德宗建中三年二月崇敬奏上丁釋奠其日准舊例合集朝官講論五經文義自大曆五年以前掌行不絕其年八月以後權停講論今旣日逼恐須復舊依奏

宇文炫爲右補闕以德宗貞元三年正月上言請京畿諸縣鄉村廢寺竝爲學竝上制置事三十餘件疏奏不報

裴肅貞元中爲國子司業奏爾雅爲六經文字之楷老子是聖人玄微之旨請勒天下明經進士五經及明一經進士五經及諸科舉人依前習道德經者宜准天寶元年勅處分應合習爾雅者竝准舊式初天寶元年尊崇道教以老子乃玄元皇帝微言與旨不可列爲小經令有司以爾雅代老子至貞元五年四月宰臣又議云所習爾雅多是草木鳥獸之名無益

理道又令舉人停爾雅改習道德經至是又改焉
武少儀爲國子司業貞元十七年五月訛言云外人
妄談禁中事神威軍令將吏分補入軍中鞠問時國
子監學生何竦曹壽被收少儀上疏言太學生何竦
曹壽等今月十四日有兩人稱是神威軍官健本軍
奏進止令追其人亦不言姓名緣神威是禁軍稱奉
進止所由不敢隨去臣亦不敢牒問經今二日更不
見迴臣伏以何竦曹壽等學生之中素無異迹皆勤
藝業臣職在監臨頗所諳委察訪遊處不涉非違今
忽被軍中密收恐橫被誣誤太學生曹多來自遠方

自見追此二人不知其故咸聞驚懼莫敢保安何竦
等儻情理難容伏乞明示罪狀加以刑法如或枉遭
誣執伏計必盡其辭冀無濫罰人知懲警臣謬當承
乏職令生徒令其干犯國章敢逃罪責由是何竦曹
壽得釋

馮伉爲國子祭酒憲宗元和元年四月伉奏應解補
學生等國家崇儒本於勸學旣居庠序宜在交脩有
其藝業不勤遊處非類樗蒲六博酗酒喧爭凌慢有
司不脩法度有一於此竝請解退又有文章帖義不
及格限頻經五年不堪申送者亦請解退其禮部所

補學生到日亦請准格帖試然後給厨後每月一度
試經年等第不進者停厨庶以止姦示其激勸又准
格九年不及第者卽出監訪聞比來多改名却入起
今已後如有此類請送法司准式科處勅旨從之
元和二年八月國子監奏准勅今月二十四日諸州
府鄉貢明經進士見訪宜令就國學官講論質定疑
義仍令百僚觀禮者伏恐學官職位稍卑未足飾揚
盛事伏請選擇掌叅官有儒學者三兩人與學官有
儒學者庶聖朝盛典輝映古今於是命兵部郎中蔣
武考功員外郎劉伯芻著作郎李蕃太常博士朱頴

郊王府諮議章庭規同赴國子監講論是年十二月
國子監奏兩京諸館學生總六百五十員請每館定
額如後兩監學生總五百五十員國子館八十員太
學館七十員四門館三百員廣文館六十員律館二
十員書館十員算館十員又奏伏見天寶以前國館
學生其數至多竝有員額至永泰後四監置五百五
十員東監近置一百員未定每館員額今謹具定額
如後伏請下禮部准額補置勅旨依奏

鄭餘慶為太子少師判國子祭酒事元和十三年十
一月餘慶以太學荒墜日久生徒不振遂奏請率文

官俸祿脩廣兩京國子監時論美之十四年十二月
餘慶又奏請京見任文官一品以下九品以上及外
使兼京正員官者每月所請料錢請率計每貫抽一
十文以充國子監脩造先師廟及諸室宇繕壁經公
廡雜用之餘益充本錢諸色隨便宜處置臣以爲歷
事文吏無非孔徒所取至微足以資學教化之根本
人倫之紀綱陛下文德武功勘亂除暴事超歷代道
冠百王國學毀壞荒蕪蓋以兵戎日久而葺修未暇
也今寇雖滌蕩天下砥平爰俾耆臣叨領儒職臣兢
於受命敢不肅恭伏念旬時莫過於此伏望天恩便

賜允許仍令戶部每月據數並以實錢付國子監其
東都留司京官亦准數率錢便充東都國子監脩理
制可

韋乾度爲國子祭酒穆宗長慶二年閏十月奏當監
四館學生每年有及第闕員其四方有請補學生人
竝不曾先於監司陳狀便自投名禮部計會補署監
司因循日久官吏都簡舉但准禮部開牒收管有乖
太學引進之路臣旣忝守官請起今已後應四館有
闕其每年請補學生者須先經監司陳狀稱請替某
人闕監司則先考試通畢然後具姓名申禮部仍稱

堪充學生如無監司解申請不在收管之限舊例每
給付厨房動多喧競請起今以後當監進士明經等
待補署畢關牒到監司則重考試其進士等若重試
及格當日便給厨房其明經等考試及格後待經監
司解送則給厨房庶息喧爭當監四館學生有及第
出監者便將本住房轉與親故其合得房學生則無
房可給請起今以後學生有及第出監者仰館子先
通狀納房待有新補學生公試畢後便給令居住當
監承前竝無專知館博士請起今以後每館衆定一
人知館事如生徒無故喧競者仰館子與業長通狀

領過知館博士則准監司條流處分其中事有過悞
衆可容恕監司自議科决如有悖慢師長彊暴鬪打
請牒府縣錮身送鄉貫勅旨宜依
文宗太和五年十二月國子祭酒裴通奏當司所授
丞簿及諸博士助教直講等謹按六典云丞掌判監
事凡六學生每有業成上于監者以其業與司業祭
酒試之明經帖經口試策經義進士帖一中經試雜
文策時務徵事注云其試法皆依考功口試明經帖
限通八以上明法明算皆通九以上主簿掌印勾簡
凡學生有不率師教者則舉而免之其頻三年下第



九年在學無成者亦如之注云假如違程限及作樂
雜戲者同准彈琴習射不禁諸博士助教皆分經教
授學者每授一經必令終講所講未終不得改業諸
博士助教皆云諸學生讀經文通熟然後授文講義
每旬放一日休假前一日博士考試其試讀書每千
言內試一帖帖三言講義者每二千言內問大義一
條總試三條通二為及第通一及全不通者斟量決
罰謹具當司官吏及學生令典條件如前伏望勅下
有司允臣所奏勅旨宜依
七年八月國子監起請准今月九日德音節文令監

司於諸道摽訪名儒置五經博士一人者伏以勸學
專門復古之制博採計當年講授多少以為考課等
級應補當司諸學生等按學令儒術以備國庠作事
之初須有獎進伏請五經博士秩比國子博士今左
氏春秋禮記周易尚書毛詩為五經論語爾雅孝經
等編簡既少不可特立學官更請依舊附入中經勅
旨依奏其年十二月勅於國子監講堂兩廊創立石
壁九經并孝經論語爾雅共一百五十九卷字樣四
十卷

鄭覃為相兼國子祭酒文宗開成元年覃奏請置五



經博士各一人緣無祿俸請依王府例給祿粟從之
開成二年八月國子監奏得覆定石經字體官翰林
待詔唐玄度狀准太和七年二月五日勅覆九經字
體者今所詳覆多依司業張參五經字為准其舊字
樣歲月將久畫點參差傳寫相承漸致乖誤今竝依
字書與較勘同商較是非取其適中纂錄為新加九
經字樣一卷請附於五經樣之末用證紕誤勅旨依
奏

馮審為國子祭酒宣宗大中五年十一月審奏孔子
廟堂碑是太宗皇帝建立睿宗皇帝書額備稱唐德

具贊鴻猷文翰顯然貞石斯在洎武后權政國號潛
移竊於篆額中間認加大周二字豈可尚存偽號以
紊清朝疑誤將來傳流僭謬其大周兩字伏乞天恩
許令琢去謹錄奏聞勅馮審所請刊正說文頗叶事
體宜依

皮日休以懿宗咸通中舉進士尚書二首其一請以
孟子為學科詞曰臣聞聖人之道不過乎經經之降
者不過乎史史之降者不過乎子子不異乎道者孟
子也捨是而子者必斥乎經史為聖人之賊也夫孟
子之文燦若經傳天惜其道不燼於秦自漢代得其



書嘗置博士以顯其學故其文繼乎六藝光乎百氏
得真聖人之微旨也不然者何其道燁燁於前而其
書汲汲於後得非道拘乎正文失於與有好邪者憚
正而不舉嗜淺者鄙與而無稱邪蓋仲尼愛文王如
嗜昌歎以取味後之人將愛仲尼者其嗜在乎孟子
矣夫古之士以湯武為逆取者其不讀孟子乎以楊
墨為達智者其不讀孟子乎由是觀之孟子之功利
於人亦不輕矣今有司除茂才至明經外其次有熟
莊周列子書者亦登於科其誘善也雖深而懸科也
未正夫莊列之文荒唐之文也讀之可以為方外之

士習之可以為洪荒之民安有能汲汲以救時補教
為志哉伏請命有司去莊列之書以孟子為主有能
精通其義者其科選視明經同苟若是也不謝漢之
博士矣

孔緯為相兼國子祭酒昭宗大順元年二月緯奏文
宣王祠廟經兵火焚毀有司釋奠無所請内外文臣
各於本官料錢上每一緡抽十文助修國學從之
後唐段顥為太嘗丞明宗天成二年三月奏請國學
五經博士各講本經以申橫經齒胄之義四年十二
月國子監奏伏以國家開設庠序比要教授生徒所

以日就月將知討論之不廢卜禘視學明考較之有程先生既以親臨學士豈宜他適蓋以頃者監名雖補各以私便無嘗且居罔離羣則學能敬業終成孤陋誰爲琢磨但希託迹爲梯媒只以多年爲次第罔思蟻術惟俟鶯遷恐淹違養之時徒積觀光之歲今國家化被流沙漸海政敷有截無疆大扇素風恢張至道是以重興數仞分設諸官教且有嘗業成無忒而况時物甚賤館舍尤多諒無懸罄之虞足得撞鍾之問但自學徒所好可以教亦隨機既欲成名必須精業如有好春秋者教之以屬辭比事三體五情尊

王室而討不庭昭沮勸而起新舊其所異同者則引之以二傳也如有好禮者則教之以恭儉莊敬長幼尊卑言揖讓而知獻酬明冠昏而重喪祭其所沿革者則證之以二禮也如有好詩者則教之以溫柔敦厚辨之以草木蟲魚美盛德而刺淫昏歌風雅而察正變如有好書者則教之以疏通知遠釋之以訓誥典謨思帝德而敬王言稽古道而統皇極如有好易者則教之以潔淨精微戒之以躁動競進體十翼而分交叉應吉凶而先據議也至於歷代子史備述變通既屬異端誠非教本但以適當凝凍將近試期欲

講小經以消短景今已請尚書博士田畝講勘論語
孝經行莫大於事親道莫逾於務本如有京中諸官
子弟及外道舉人况四門博士趙著見講春秋若有
聽人從其所欲顯俟放榜別啓諸經旣温故而知新
惜寸陰而輕尺璧顯經者若能口誦碩學者又得指
歸自然縻好爵以當仁策科名而得俊幸不孤於選
士冀有益於化風從之
主騫爲刑部郎中天成二年七月奏請採訪圖籍
呂或休爲左補闕天成四年五月上書請勅諸道興
崇學較

李超爲著作郎長興元年十月奏秘書監空有省名
而無廨署藏書之府無屋一間無書一卷非人文化
成之道請依六典創修之

楚馥爲尚書博士長興三年奏請皇子習尚書知君
臣父子之義

漢司徒詡爲禮部侍郎乾祐三年上言臣聞致理之
方咸資稽古多聞之道詎捨羣書歷代已來斯文不
墜石渠蓬閣今則闕於芸編百氏九流在廣頒於搜
訪唐朝竝開三館皆貯百家開元之朝羣書大備離
亂之後散失頗多臣請國家開獻書之路凡天下文

儒衣冠舊族有收得三館亡書許投館進納據卷帙
 多少則酬之以緡帛多則酬以官資自然五六
 年間庶幾粗備從之

冊府元龜

